

春秋穀梁傳

隱公

元年春王正月雖無事必舉正月謹始也公何以不言卽位成公志也焉成之言君之不取爲公也君之不取爲公何也將以讓桓也讓桓正乎曰不正春秋成人之美不成人之惡隱不正而成之何也將以惡桓也其惡桓何也隱將讓而桓弑之則桓惡矣桓弑而隱讓則隱善矣善則其不正焉何也春秋貴義而不貴惠信道而不信邪孝子揚父之美不揚父之惡先君之欲與桓非正也邪也雖然旣勝其邪心以與隱矣已探先君之邪志而遂以與桓則是成父之惡也兄弟天倫也爲子受之父爲諸侯受之君已廢天倫而忘君父以行小惠曰小道也若隱者可謂輕千乘之國蹈道則未也○三月公及邾儀父盟于昧及者何內爲志焉爾儀字也父猶傅也男子之美稱也其不言邾子何也邾之上古微未爵命於周也不日其盟渝也昧地名也○夏五月鄭伯克段于鄆克者何能也能殺也何以不言殺見段之有徒衆也段鄭伯弟也何以知其爲弟也殺世子母弟目君以其目君知其爲弟也段弟也

而弗謂弟公子也而弗謂公子貶之也段失子弟之道矣賤段而甚鄭伯也何甚乎鄭伯甚鄭伯之處心積慮成於殺也于鄆遠也猶曰取之其母之懷中而殺之云爾甚之也然則爲鄭伯者宜奈何緩追逸賊親親之道也○秋七月天王使宰咺來歸惠公仲子之賵母以子氏仲子者何惠公之母孝公之妾也禮賵人之母則可賵人之妾則不可君子以其可辭受之其志不及事也賵者何也乘馬曰賵衣衾曰襚貝玉曰含錢財曰賵○九月及宋人盟于宿及者何內卑者也宋人外卑者也卑者之盟不日宿邑名也○冬十有二月祭伯來來者來朝也其弗謂朝何也襄內諸侯非有天子之命不得出會諸侯不正其外交故弗與朝也聘弓鏃矢不出竟場束脩之肉不行竟中有至尊者不貳之也○公子益師卒大夫日卒正也不日卒惡也二年春公會戎于潛會者外爲主焉爾知者慮義者行仁者守有此三者然後可以出會會戎危公也○夏五月莒人入入者內弗受也向我邑也○無佗帥師入極入者內弗受也極國也苟焉以入人爲志者人亦人之矣不稱氏者滅同姓貶也○秋八月庚辰公及戎盟于唐○九月紀履緌來逆女逆女親者也使大夫非正也以

國氏者爲其來交接於我故君子進之也○冬十月伯姬歸于紀禮婦人謂嫁曰歸反曰來歸從人者也婦人在家制於父既嫁制於夫夫死從長子婦人不專行必有從也伯姬歸于紀此其如專行之辭何也曰非專行也吾伯姬歸于紀故志之也其不言使何也逆之道微無足道焉爾○紀子伯莒子盟于密或曰紀子伯莒子而與之盟或曰年同爵同故紀子以伯先也○十有二月乙卯夫人子氏薨夫人薨不地夫人者隱之妻也卒而不書葬夫人之義從君者也○鄭人伐衛

三年春王二月己巳日有食之言日不言朔食晦日也其日有食之何也吐者外壤食者內壤闕然不見其壤有食之者也有內辭也或外辭也有食之者內於日也其不言食之者何也知其不可知也○三月庚辰天王崩高曰崩厚曰崩尊曰崩天子之崩以尊也其崩之何也以其在民上故崩之其不名何也大上故不名也○夏四月辛卯尹氏卒尹氏者何也天子之大夫也外大夫不卒此何以卒之也於天子之崩爲魯主故隱而卒之○秋武氏子來求賻武氏子者何也天子之大夫也天子之大夫其稱武氏之子何也未畢喪孤未爵未爵使之非正也其不言使何也無君

也歸死者曰贈歸生者曰賻曰歸之者正也求之者非正也周雖不求魯不可以不歸魯雖不歸周不可以求之求之爲言得不得未可知之辭也交譏之○八月庚辰宋公和卒諸侯日卒正也○冬十有二月齊侯鄭伯盟于石門○癸未葬宋繆公日葬故也危不得葬也

四年春王二月莒人伐杞取牟婁傳曰言伐言取所惡也諸侯相伐取地於是始故謹而志之也○戊申衛祝吁弑其君完大夫弑其君以國氏者嫌也弑而代之也○夏公及宋公遇于清及者內爲志焉爾遇者志相得也○宋公陳侯蔡人衛人伐鄭○秋鞏帥師會宋公陳侯蔡人衛人伐鄭鞏者何也公子鞏也其不稱公子何也貶之也何爲貶之也與于弑公故貶也○九月衛人殺祝吁于濮稱人以殺殺有罪也祝吁之挈失嫌也其月謹之也于濮者譏失賊也○冬十有二月衛人立晉衛人者衆辭也立者不宜立者也晉之名惡也其稱人以立之何也得衆也得衆則是賢也賢則其曰不宜立何也春秋之義諸侯與正而不與賢也

五年春公觀魚于棠傳曰常事曰視非常曰觀禮尊不親小事卑不尸大功魚卑者

之事也公觀之非正也○夏四月葬衛桓公月葬故也○秋衛師入邾入者內弗受也邾國也將卑師衆曰師○九月考仲子之宮考者何也考者成之也成之爲夫人也禮庶子爲君爲其母築宮使公子主其祭也於子祭於孫止仲子者惠公之母隱孫而脩之非隱也初獻六羽初始也穀梁子曰舞夏天子八佾諸公六佾諸侯四佾初獻六羽始僭樂矣尸子曰舞夏自天子至諸侯皆用八佾初獻六羽始厲樂矣○邾人鄭人伐宋○螟蟲災也甚則月不甚則時○冬十有二月辛巳公子彊卒隱不爵命大夫其曰公子彊何也先君之大夫也○宋人伐鄭圍長葛伐國不言圍邑此其言圍何也久之也伐不踰時戰不逐奔誅不填服苞人民毆牛馬曰侵斬樹木壞宮室曰伐

六年春鄭人來輸平輸者墮也平之爲言以道成也來輸平者不果成也○夏五月辛酉公會齊侯盟于艾○秋七月○冬宋人取長葛外取邑不志此其志何也久之也

七年春王三月叔姬歸于紀其不言逆何也逆之道微無足道焉爾○滕侯卒滕侯

無名少曰世子長曰君狄道也其不正者名也○夏城中丘城爲保民爲之也民衆城小則益城益城無極凡城之志皆譏也○齊侯使其弟年來聘諸侯之尊弟兄不得以屬通其弟云者以其來接於我舉其貴者也○秋公伐邾○冬天王使凡伯來聘戎伐凡伯于楚丘以歸凡伯者何也天子之大夫也國而曰伐此一人而曰伐何也大天子之命也戎者衛也戎衛者爲其伐天子之使貶而戎之也楚丘衛之邑也以歸猶愈乎執也

八年春宋公衛侯遇于垂不期而會曰遇遇者志相得也○三月鄭伯使宛來歸郕名宛所以貶鄭伯惡與地也○庚寅我入邲入者內弗受也日入惡入者也邲者鄭伯所受命於天子而祭泰山之邑也○夏六月己亥蔡侯考父卒諸侯日卒正也○辛亥宿男卒宿微國也未能同盟故男卒也○秋七月庚午宋公齊侯衛侯盟于瓦屋外盟不日此其日何也諸侯之參盟於是始故謹而日之也詰誓不及五帝盟詛不及三王交質子不及二伯○八月葬蔡宣公月葬故也○九月辛卯公及莒人盟于包來可言公及人不可言公及大夫○螟○冬十有二月無佻卒無佻之名未有

聞焉或曰隱不爵大夫也或說曰故貶之也

九年春天王使南季來聘南氏姓也季字也聘問也聘諸侯非正也○三月癸酉大雨震電震雷也電霆也○庚辰大雨雪志疏數也八日之間再有大變陰陽錯行故謹而日之也雨月志正也○俠卒俠者所俠也弗大夫者隱不爵大夫也隱之不爵大夫何也曰不成爲君也○夏城郕○秋七月無事焉何以書不遺時也○冬公會齊侯于防會者外爲主焉爾

十年春王二月公會齊侯鄭伯于中丘○夏翬帥師會齊人鄭人伐宋○六月壬戌公敗宋師于菅內不言戰舉其大者也辛未取郕辛巳取防取邑不日此其日何也不正其乘敗人而深爲利取二邑故謹而日之也○秋宋人衛人入鄭○宋人蔡人衛人伐載鄭伯伐取之不正其因人之力而易取之故主其事也○冬十月壬午齊人鄭人入郕入者內弗受也日入惡入者也郕國也

十有一年春滕侯薛侯來朝天子無事諸侯相朝正也考禮脩德所以尊天子也諸侯來朝時正也犗言同時也累數皆至也○夏五月公會鄭伯于時來○秋七月壬

午公及齊侯鄭伯入許○冬十有一月壬辰公薨公薨不地故也隱之不忍地也其不言葬何也君弑賊不討不書葬以罪下也隱十年無正隱不自正也元年有正所以正隱也

桓公

元年春王桓無王其曰王何也謹始也其曰無王何也桓弟弑兄臣弑君天子不能定諸侯不能救百姓不能去以爲無王之道遂可以至焉爾元年有王所以治桓也正月公卽位繼故不言卽位正也繼故不言卽位之爲正何也曰先君不以其道終則子弟不忍卽位也繼故而言卽位則是與聞乎弑也繼故而言卽位是爲與聞乎弑何也曰先君不以其道終已正卽位之道而卽位是無恩於先君也○三月公會鄭伯于垂會者外爲主焉爾○鄭伯以璧假許田假不言以言以非假也非假而曰假諱易地也禮天子在上諸侯不得以地相與也無田則無許可知矣不言許不與許也許田者魯朝宿之邑也邴者鄭伯之所受命而祭泰山之邑也用見魯之不朝於周而鄭之不祭泰山也○夏四月丁未公及鄭伯盟于越及者內爲志焉爾越盟

地之名也○秋大水高下有水災曰大水○冬十月無事焉何以書不遺時也春秋編年四時具而後爲年

二年春王正月戊申宋督弑其君與夷桓無王其曰王何也正與夷之卒也及其大夫孔父孔父先死其曰及何也書尊及卑春秋之義也孔父之先死何也督欲弑君而恐不立於是乎先殺孔父孔父閑也何以知其先殺孔父也曰子既死父不忍稱其名臣既死君不忍稱其名以是知君之累之也孔氏父字諡也或曰其不稱名蓋爲祖諱也孔子故宋也○滕子來朝○三月公會齊侯陳侯鄭伯于稷以成宋亂以者內爲志焉爾公爲志乎成是亂也此成矣取不成事之辭而加之焉於內之惡而君子無遺焉爾○夏四月取郟大鼎于宋戊申納于太廟桓內弑其君外成人之亂受賂而退以事其祖非禮也其道以周公爲弗受也郟鼎者郟之所爲也曰宋取之宋也以是爲討之鼎也孔子曰名從主人物從中國故曰郟大鼎也○秋七月紀侯來朝朝時此其月何也桓內弑其君外成人之亂於是爲齊侯陳侯鄭伯討數日以賂已卽是事而朝之惡之故謹而月之也○蔡侯鄭伯會于鄧○九月入杞我入之

也○公及戎盟于唐○冬公至自唐桓無會而其致何也遠之也

三年春正月公會齊侯于贏○夏齊侯衛侯胥命于蒲胥之爲言猶相也相命而信
諭謹言而退以是爲近古也是必一人先其以相言之何也不以齊侯命衛侯也○
六月公會杞侯于郕○秋七月壬辰朔日有食之旣言日言朔食正朔也旣者盡也
有繼之辭也○公子翬如齊逆女逆女親者也使大夫非正也九月齊侯送姜氏于
謹禮送女父不下堂母不出祭門諸母兄弟不出闕門父戒之曰謹慎從爾舅之言
母戒之曰謹慎從爾姑之言諸母般申之曰謹慎從爾父母之言送女踰竟非禮也
公會齊侯于謹無譏乎曰爲禮也齊侯來也公之逆而會之可也夫人姜氏至自齊
其不言登之以來何也公親受之于齊侯也子貢曰冕而親迎不已重乎孔子曰合
二姓一好以繼萬世之後何謂已重乎○冬齊侯使其弟年來聘○有年五穀皆熟
爲有年也

四年春正月公狩于郎四時之田皆爲宗廟之事也春曰田夏曰苗秋曰蒐冬曰狩
四時之田用三焉唯其所先得一爲乾豆二爲賓客三爲充君之庖○夏天王使宰

渠伯糾來聘

五年春正月甲戌己丑陳侯鮑卒鮑卒何爲以二日卒之春秋之義信以傳信疑以傳疑陳侯以甲戌之日出己丑之日得不知死之日故舉二日以包也○夏齊侯鄭伯如紀○天王使任叔之子來聘任叔之子者錄父以使子也故微其君臣而著其父子不正父在子代仕之辭也○葬陳桓公○城祝丘○秋蔡人衛人陳人從王伐鄭舉從者之辭也其舉從者之辭何也爲天王諱伐鄭也鄭同姓之國也在乎冀州於是不服爲天子病矣○大雩○螽螽蟲災也甚則月不甚則時○冬州公如曹外相如不書此其書何也過我也

六年春正月寔來寔來者是來也何謂是來謂州公也其謂之是來何也以其畫我故簡言之也諸侯不以過相朝也○夏四月公會紀侯于郕○秋八月壬午大閱大閱者何閱兵車也脩教明諭國道也平而脩戎事非正也其日以爲崇武故謹而日之蓋以觀婦人也○蔡人殺陳佗陳佗者陳君也其曰陳佗何也匹夫行故匹夫稱之也其匹夫行奈何陳侯意獵淫獵子蔡與蔡人爭禽蔡人不知其是陳君也而殺

之何以知其是陳君也兩下相殺不道其不地於蔡也○九月丁卯子同生疑故志之時曰同乎人也○冬紀侯來朝

七年春二月己亥焚咸丘其不言邾咸丘何也疾其以火攻也○夏穀伯綏來朝○鄆侯吾離來朝其名何也失國也失國則其以朝言之何也嘗以諸侯與之接矣雖失國弗損吾異日也

八年春正月己卯烝烝冬事也春興之志不時也○天王使冢父來聘○夏五月丁丑烝烝冬事也春夏興之黷祀也志不敬也○秋伐邾○冬十月雨雪○祭公來遂逆王后于紀其不言使焉何也不正其以宗廟之大事即謀於我故弗與使也遂繼事之辭也其曰遂逆王后故略之也或曰天子無外王命之則成矣

九年春紀季姜歸于京師爲之中者歸之也○夏四月○秋七月○冬曹伯使其世子射姑來朝朝不言使言使非正也使世子伉諸侯之禮而來朝曹伯失正矣諸侯相見曰朝以待人父之道待人之子以內爲失正矣內失正曹伯失正世子可以已矣則是故命也尸子曰夫已多乎道

十年春王正月庚申曹伯終生卒桓無王其曰王何也正終生之卒也○夏五月葬曹桓公○秋公會衛侯于桃丘弗遇弗遇者志不相得也弗內辭也○冬十有二月丙午齊侯衛侯鄭伯來戰于郎來戰者前定之戰也內不言戰言戰則敗也不言其人以吾敗也不言及者爲內諱也

十有一年春正月齊人衛人鄭人盟于惡曹○夏五月癸未鄭伯寤生卒○秋七月葬鄭莊公○九月宋人執鄭祭仲宋人者宋公也其曰人何也貶之也○突歸于鄭曰突賤之也曰歸易辭也祭仲易其事權在祭仲也死君難臣道也今立惡而黜正惡祭仲也○鄭忽出奔衛鄭忽者世子忽也其名失國也○柔會宋公陳侯蔡叔盟于折柔者何吾大夫之未命者也○公會宋公子夫鍾○冬十有二月公會宋公子闕

十有二年春正月○夏六月壬寅公會紀侯莒子盟于曲池○秋七月丁亥公會宋公燕人盟于穀丘○八月壬辰陳侯躍卒○公會宋公子虛○冬十有一月公會宋公子龜○丙戌公會鄭伯盟于武父○丙戌衛侯晉卒再稱日決日義也○十有二

月及鄭師伐宋丁未戰于宋非與所與伐戰也不言與鄭戰恥不和也於伐與戰敗也內諱敗舉其可道者也

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績其言及者由內及之也其曰戰者由外言之也戰稱人敗稱師重衆也其不地於紀也○三月葬衛宣公○夏大水○秋七月○冬十月

十有四年春正月公會鄭伯于曹○無冰無冰時燠也○夏五鄭伯使其弟禦來盟諸侯之尊弟兄不得以屬通其弟云者以其來我舉其貴者也來盟前定也不日前定之盟不日孔子曰聽遠音者聞其疾而不聞其舒望遠者察其貌而不察其形立乎定哀以指隱桓隱桓之日遠矣夏五傳疑也○秋八月壬申御廩災乙亥嘗御廩之災不志此其志何也以爲唯未易災之餘而嘗可也志不敬也天子親耕以共粢盛王后親蠶以共祭服國非無良農工女也以爲人之所盡事其祖禰不若以己所自親者也何用見其未易災之餘而嘗也曰甸粟而內之三宮三宮米而藏之御廩夫嘗必有兼甸之事焉壬申御廩災乙亥嘗以爲未易災之餘而嘗也○冬十有二

月丁巳齊侯祿父卒○宋人以齊人蔡人衛人陳人伐鄭以者不以者也民者君之本也使人以其死非正也

十有五年春二月天王使冢父來求車古者諸侯時獻于天子以其國之所有故有辭讓而無徵求求車非禮也求金甚矣○三月乙未天王崩○夏四月己巳葬齊僖公○五月鄭伯突出奔蔡譏奪正也○鄭世子忽復歸于鄭反正也○許叔入于許許叔許之貴者也莫宜乎許叔其曰入何也其歸之道非所以歸也○公會齊侯于蒿○邾人牟人葛人來朝○秋九月鄭伯突入于櫟○冬十有一月公會宋公衛侯陳侯于袤伐鄭地而後伐疑辭也非其疑也

十有六年春正月公會宋公蔡侯衛侯于曹○夏四月公會宋公衛侯陳侯蔡侯伐鄭○秋七月公至自伐鄭桓無會其致何也危之也○冬城向○十有一月衛侯朔出奔齊朔之名惡也天子召而不往也

十有七年春正月丙辰公會齊侯紀侯盟于黃○二月丙午公及邾儀父盟于趨○夏五月丙午及齊師戰于郎內諱敗舉其可道者也不言其人以吾敗也不言及之

者爲內諱也○六月丁丑蔡侯封人卒○秋八月蔡季自陳歸於蔡蔡季蔡之貴者也自陳陳有奉焉爾○癸巳葬蔡桓侯○及宋人衛人伐邾○冬十月朔日有食之言朔不言日食既朔也

十有八年春王正月公會齊侯于濼公與夫人姜氏遂如齊濼之會不言及夫人何也以夫人之仇弗稱數也○夏四月丙子公薨于齊其地於外也薨稱公舉上也丁酉公之喪至自齊○秋七月○冬十有二月己丑葬我君桓公葬我君接上下也君弑賊不討不書葬此其言葬何也不責踰國而討于是也桓公葬而後舉諡諡所以成德也於卒事乎加之矣知者慮義者行仁者守有此三者備然後可以會矣

莊公

元年春王正月繼弑君不言卽位正也繼弑不言卽位之爲正何也曰先君不以其道終則子不忍卽位也○三月夫人孫于齊孫之爲言猶孫也諱奔也接練時錄母之變始人之也不言氏姓貶之也人之於天也以道受命於人也以言受命不若於道者天絕之也不若於言者人絕之也臣子大受命○夏單伯逆王姬單伯者何吾

大夫之命乎天子者也命大夫故不名也其不言如何也其義不可受於京師也其義不可受於京師何也曰躬君弑於齊使之主婚姻與齊爲禮其義固不可受也○秋築王姬之館于外築禮也于外非禮也築之爲禮何也主王姬者必自公門出於廟則已尊於寢則已卑爲之築節矣築之外變之正也築之外變之爲正何也仇讎之人非所以接婚姻也衰麻非所以接弁冕也其不言齊侯之來逆何也不使齊侯得與吾爲禮也○冬十月乙亥陳侯林卒諸侯日卒正也○王使榮叔來錫桓公命禮有受命無來錫命錫命非正也生服之死行之禮也生不服死追錫之不正甚矣○王姬歸于齊爲之中者歸之也○齊師遷紀邢鄆鄆紀國也邢鄆鄆國也或曰遷紀于邢鄆鄆

二年春王二月葬陳莊公○夏公子慶父帥師伐於餘丘國而曰伐於餘丘邾之邑也其曰伐何也公子貴矣師重矣而敵人之邑公子病矣病公子所以譏乎公也其一曰君在而重之也○秋七月齊王姬卒爲之主者卒之也○冬十有二月夫人姜氏會齊侯于禚婦人旣嫁不踰竟踰竟非正也婦人不言會言會非正也饜甚矣○

乙酉宋公馮卒

三年春王正月朔會齊侯伐衛溺者何也公子溺也其不稱公子何也惡其會仇讎而伐同姓故貶而名之也○夏四月葬宋莊公月葬故也○五月葬桓王傳曰改葬也改葬之禮總舉下緬也或曰郤尸以求諸侯天子志崩不志葬必其時也何必焉舉天下而葬一人其義不疑也志葬故也危不得葬也日近不失崩不志崩失天下也獨陰不生獨陽不生獨天不生三合然後生故曰母之子也可天之子也可尊者取尊稱焉卑者取卑稱焉其曰王者民之所歸往也○秋紀季以鄆入于齊鄆紀之邑也入于齊者以鄆事齊也入者內弗受也○冬公次于郎次止也有畏也欲救紀而不能也

四年春王二月夫人姜氏饗齊侯于祝丘饗甚矣饗齊侯所以病齊侯也○三月紀伯姬卒外夫人不卒此其言卒何也吾女也適諸侯則尊同以吾爲之變卒之也○夏齊侯陳侯鄭伯遇于垂○紀侯大去其國大去者不遺一人之辭也言民之從者四年而後畢也紀侯賢而齊侯滅之不言滅而曰大去其國者不使小人加乎君子

○六月乙丑齊侯葬紀伯姬外夫人不書葬此其書葬何也吾女也失國故隱而葬之○秋七月○冬公及齊人狩于郟齊人者齊侯也其曰人何也卑公之敵所以卑公也何爲卑公也不復讎而怨不釋刺釋怨也

五年春王正月○夏夫人姜氏如齊師師而曰如衆也婦人旣嫁不踰竟踰竟非禮也○秋郟黎來來朝郟國也黎來微國之君未爵命者也○冬公會齊人宋人陳人蔡人伐衛是齊侯宋公也其曰人何也人諸侯所以人公也其人公何也逆天王之命也

六年春王三月壬子突救衛王人卑者也稱名賞之也善救衛也救者善則伐者不正矣○夏六月衛侯朔入于衛其不言伐衛納朔何也不逆天王之命也入者內弗受也何用弗受也爲以王命絕之也朔之名惡也朔入逆則出順矣朔出入名以王命絕之也○秋公至自伐衛惡事不致此其致何也不致則無用見公之惡事之成也○鯀○冬齊人來歸衛寶以齊首之分惡於齊也使之如下齊而來我然惡戰則殺矣

七年春夫人姜氏會齊侯于防婦人不會會非正也○夏四月辛卯昔彗星不見恒星者經星也日入至於星出謂之昔不見者可以見也夜中星隕如雨其隕也如雨是夜中與春秋著以傳著疑以傳疑中之幾也而曰夜中著焉爾何用見其中也失變而錄其時則夜中矣其不曰恒星之隕何也我知恒星之不見而不知其隕也我見其隕而接於地者則是雨說也著於上見於下謂之雨著於下不見於上謂之隕豈雨說哉○秋大水高下有水災曰大水○無麥苗麥苗同時也○冬夫人姜氏會齊侯于穀婦人不會會非正也

八年春王正月師次于郎以俟陳人蔡人次止也俟待也甲午治兵出曰治兵習戰也入曰振旅習戰也治兵而陳蔡不至矣兵事以嚴終故曰善陳者不戰此之謂也善爲國者不師善師者不陳善陳者不戰善戰者不死善死者不亡○夏師及齊師圍郕郕降于齊師其曰降于齊師何不使齊師加威於郕也○秋師還還者事未畢也遯也○冬十有一月癸未齊無知弑其君諸兒大夫弑其君以國氏者嫌也弑而代之也

九年春齊人殺無知無知之挈失嫌也稱人以殺大夫殺有罪也○公及齊大夫盟于暨公不及大夫大夫不名無君也盟納子糾也不日其盟渝也當齊無君制在公矣當可納而不納故惡內也○夏公伐齊納糾當可納而不納齊變而後伐故乾時之戰不諱敗惡內也○齊小白入于齊大夫出奔反以好日歸以惡日入齊公孫無知弑襄公公子糾公子小白不能存出亡齊人殺無知而迎公子糾於魯公子小白不讓公子糾先入又殺之于魯故曰齊小白入于齊惡之也○秋七月丁酉葬齊襄公○八月庚申及齊師戰于乾時我師敗績○九月齊人取子糾殺之外不言取言取病內也取易辭也猶曰取其子糾而殺之云爾十室之邑可以逃難百室之邑可以隱死以千乘之魯而不能存子糾以公爲病矣○冬浚洙浚洙者深洙也著力不足也

十年春王正月公敗齊師于長勺不日疑戰也疑戰而曰敗勝內也○二月公侵宋侵時此其月何也乃深其怨於齊又退侵宋以衆其敵惡之故謹而月之○三月宋人遷宿遷亡辭也其不地宿不復見也遷者猶未失其國家以往者也○夏六月齊

師宋師次于郎次止也畏我也○公敗宋師于乘丘不日疑戰也疑戰而曰敗勝內也○秋九月荆敗蔡師于莘以蔡侯獻武歸荆者楚也何爲謂之荆狄之也何爲狄之聖人立必後至天子弱必先叛故曰荆狄之也蔡侯何以名也絕之也何爲絕之獲也中國不言敗此其言敗何也中國不言敗蔡侯其見獲乎其言敗何也釋蔡侯之獲也以歸猶愈乎執也○冬十月齊師滅譚譚子奔莒

十有一年春王正月○夏五月戊寅公敗宋師于郟內事不言戰舉其大者其日成敗之也宋萬之獲也○秋宋大水外災不書此何以書王者之後也高下有水災曰大水○冬王姬歸于齊其志過我也

十有二年春王三月紀叔姬歸于鄒國而曰歸此邑也其曰歸何也吾女也失國喜得其所故言歸焉爾○夏四月 秋八月甲午宋萬弑其君捷宋萬宋之卑者也卑者以國氏及其大夫仇牧以尊及卑也仇牧閑也○冬十月宋萬出奔陳

十有三年春齊人宋人陳人蔡人邾人會于北杏是齊侯宋公也其曰人何也始疑之何疑焉桓非受命之伯也將以事授之者也曰可以乎未乎舉人衆之辭也○夏

六月齊人滅遂遂國也其不日微國也○秋七月○冬公會齊侯盟于柯曹劓之盟也信齊侯也桓盟雖內與不日信也

十有四年春齊人陳人曹人伐宋○夏單伯會伐宋會事之成也○秋七月荆入蔡荆者楚也其曰荆何也州舉之也州不如國國不如名名不如字○冬單伯會齊侯宋公衛侯鄭伯于鄆復同會也

十有五年春齊侯宋公陳侯衛侯鄭伯會于鄆復同會也○夏夫人姜氏如齊婦人既嫁不踰竟踰竟非禮也○秋宋人齊人邾人伐鄆○鄭人侵宋○冬十月

十有六年春王正月○夏宋人齊人衛人伐鄭○秋荆伐鄭○冬十有二月會齊侯宋公陳侯衛侯鄭伯許男曹伯滑伯滕子同盟于幽同者有同也同尊周也不言公外內寮一疑之也○邾子克卒其曰子進之也

十有七年春齊人執鄭詹人者衆辭也以人執與之辭也鄭詹鄭之卑者卑者不志此其志何也以其逃來志之也逃來則何志焉將有其末不得不錄其本也鄭詹鄭之佞人也○夏齊人殲于遂殲者盡也然則何爲不言遂人盡齊人也無遂之辭也

無遂則何爲言遂其猶存遂也存遂奈何曰齊人滅遂使人戍之遂之因氏飲戍者酒而殺之齊人殲焉此謂狎敵也○秋鄭詹自齊逃來逃義曰逃○冬多麋

十有八年春王三月日有食之不言日不言朔夜食也何以知其夜食也曰王者朝日故雖爲天子必有尊也貴爲諸侯必有長也故天子朝日諸侯朝朔○夏公追戎于濟西其不言戎之伐我何也以公之追之不使戎邇於我也于濟西者大之也何大焉爲公之追之也○秋有螽一有一亡曰有螿射人者也○冬十月

十有九年春王正月○夏四月○秋公子結媵陳人之婦于鄆遂及齊侯宋公盟媵淺事也不志此其志何也辟要盟也何以見其辟要盟也媵禮之輕者也盟國之重也以輕事遂乎國重無說其曰陳人之婦略之也其不日數渝惡之也○夫人姜氏如莒婦人旣嫁不踰竟踰竟非正也○冬齊人宋人陳人伐我西鄙其曰鄙遠之也其遠之何也不以難邇我國也

二十年春王二月夫人姜氏如莒婦人旣嫁不踰竟踰竟非正也○夏齊大災其志以甚也○秋七月○冬齊人伐我

二十有一年春王正月○夏五月辛酉鄭伯突卒○秋七月戊戌夫人姜氏薨婦人弗目也○冬十有二月葬鄭厲公

二十有二年春王正月肆大眚肆失也眚災也災紀也失故也爲嫌天子之葬也○癸丑葬我小君文姜小君非君也其曰君何也以其爲公配可以言小君也○陳人殺其公子禦寇言公子而不言大夫公子未命爲大夫也其曰公子何也公子之重視大夫命以執公子○夏五月○秋七月丙申及齊高傒盟于防不言公高傒伉也○冬公如齊納幣納幣大夫之事也禮有納采有問名有納徵有告期四者備而後娶禮也公之親納幣非禮也故譏之

二十有三年春公至自齊○祭叔來聘其不言使何也天子之內臣也不正其外交故不與使也○夏公如齊觀社常事曰視非常曰觀觀無事之辭也以是爲尸女也無事不出竟公至自齊公如往時正也致月故也如往月致月有懼焉爾○荆人來聘善累而後進之其曰人何也舉道不待再○公及齊侯遇于穀及者內爲志焉爾遇者志相得也○蕭叔朝公微國之君未爵命者其不言來於外也朝於廟正也於

外非正也○秋丹桓宮楹禮天子諸侯黜堊大夫倉士黈丹楹非禮也○冬十有一月曹伯射姑卒○十有二月甲寅公會齊侯盟于扈

二十有四年春王三月刻桓宮桷禮天子之桷斲之斲之加密石焉諸侯之桷斲之斲之大夫斲之士斲本刻桷非正也夫人所以崇宗廟也取非禮與非正而加之於宗廟以飾夫人非正也刻桓宮桷丹桓宮楹斥言桓宮以惡莊也○葬曹莊公○夏公如齊逆女親迎恒事也不志此其志何也不正其親迎於齊也○秋公至自齊迎者行見諸舍見諸先至非正也○八月丁丑夫人姜氏入入者內弗受也日入惡入者也何用不受也以宗廟弗受也其以宗廟弗受何也娶仇人子弟以薦舍於前其義不可受也戊寅大夫宗婦餽用幣覲見也禮大夫不見夫人不言及不正其行婦道故列數之也男子之贄羔鴈雉膳婦人之贄棗栗鍛脩用幣非禮也用者不宜用者也大夫國體也而行婦道惡之故謹而日之也○大水○冬戎侵曹曹羈出奔陳赤歸于曹郭公赤蓋郭公也何爲名也禮諸侯無外歸之義外歸非正也

二十有五年春陳侯使女叔來聘其不名何也天子之命大夫也○夏五月癸丑衛

侯朔卒○六月辛未朔日有食之言曰言朔食正朔也鼓用牲于社鼓禮也用牲非禮也天子救日置五麾陳五兵五鼓諸侯置三麾陳三鼓三兵大夫擊門士擊柝言充其陽也○伯姬歸于杞其不言逆何也逆之道微無足道焉爾○秋大水鼓用牲于社于門高下有水災曰大水既戒鼓而駭衆用牲可以已矣救日以鼓兵救水以鼓衆○冬公子友如陳

二十有六年春公伐戎○夏公至自伐戎○曹殺其大夫言大夫而不稱名姓無命大夫也無命大夫而曰大夫賢也爲曹羈崇也○秋公會宋人齊人伐徐○冬十有二月癸亥朔日有食之

二十有七年春公會杞伯姬于洸○夏六月公會齊侯宋公陳侯鄭伯同盟于幽同者有同也同尊周也於是而後授之諸侯也其授之諸侯何也齊侯得衆也桓會不致安之也桓盟不日信之也信其信仁其仁衣裳之會十有一未嘗有歃血之盟也信厚也兵車之會四未嘗有大戰也愛民也○秋公子友如陳葬原仲言葬不言卒不葬者也不葬而曰葬諱出奔也○冬杞伯姬來○莒慶來逆叔姬諸侯之嫁子於

大夫主大夫以與之來者接內也不正其接內故不與夫婦之稱也○杞伯來朝○公會齊侯于城濮

二十有八年春王三月甲寅齊人伐衛衛人及齊人戰衛人敗績於伐與戰安戰也戰衛戰則是師也其曰人何也微之也何爲微之也今授之諸侯而後有侵伐之事故微之也其人衛何也以其人齊不可不人衛也衛小齊大其以衛及之何也以其微之可以言及也其稱人以敗何也不以師敗於人也○夏四月丁未邾子貜卒○秋荆伐鄭荆者楚也其曰荆州舉之也○公會齊人宋人救鄭善救鄭也○冬築微山林藪澤之利所以與民共也虞之非正也○大無麥禾大者有顛之辭也於無禾及無麥也○臧孫辰告糴于齊國無三年之畜曰國非其國也一年不升告糴諸侯告請也糴糴也不正故舉臧孫辰以爲私行也國無九年之畜曰不足無六年之畜曰急無三年之畜曰國非其國也諸侯無粟諸侯相歸粟正也臧孫辰告糴于齊告然後與之言內之無外交也古者稅什一豐年補敗不外求而上下皆足也雖累凶年民弗病也一年不艾而百姓饑君子非之不言如爲內諱也

二十九年春新延廡延廡者法廡也其言新有故也有故則何爲書也古之君人者必時視民之所勤民勤於力則功築罕民勤於財則貢賦少民勤於食則百事廢矣冬築微春新延廡以其用民力爲已悉矣○夏鄭人侵許○秋有蜚一有一亡曰有○冬十有二月紀叔姬卒○城諸及防可城也以大及小也

三十年春王正月○夏師次于成次止也有畏也欲救鄆而不能也不言公恥不能救鄆也○秋七月齊人降鄆降猶下也鄆紀之遺邑也○八月癸亥葬紀叔姬不曰卒而曰葬閔紀之亡也○九月庚午朔日有食之鼓用牲于社○冬公及齊侯遇于魯濟及者內爲志焉爾遇者志相得也○齊人伐山戎齊人者齊侯也其曰人何也愛齊侯乎山戎也其愛之何也桓內無因國外無從諸侯而越千里之險北伐山戎危之也則非之乎善之也何善乎爾燕周之分子也責職不至山戎爲之伐矣

三十有一年春築臺于郎○夏四月薛伯卒○築臺于薛○六月齊侯來獻戎捷齊侯來獻捷者內齊侯也不言使內與同不言使也獻戎捷軍得曰捷戎殺也○秋築臺于秦不正罷民三時虞山林藪澤之利且財盡則怨力盡則懟君子危之故謹而

志之也或曰倚諸桓也桓外無諸侯之變內無國事越千里之險北伐山戎爲燕辟地魯外無諸侯之變內無國事一年罷民三時虞山林藪澤之利惡內也○冬不雨三十有二年春城小穀○夏宋公齊侯遇于梁丘遇者志相傳也梁丘在曹邾之間去齊八百里非不能從諸侯而往也辭所遇遇所不遇大齊桓也○秋七月癸巳公子牙卒○八月癸亥公薨于路寢路寢正寢也寢疾居正寢正也男子不絕于婦人之手以齊終也○冬十月乙未子般卒子卒日正也不日故也有所見則日○公子慶父如齊此奔也其曰如何也諱莫如深深則隱苟有所見莫如深也○狄伐邢

閔公

元年春王正月繼弑君不言卽位正也親之非父也尊之非君也繼之如君父也者受國焉爾○齊人救邢善救邢也○夏六月辛酉葬我君莊公莊公葬而後舉諡諡所以成德也於卒事乎加之矣○秋八月公及齊侯盟于洛姑盟納季子也季子來歸其曰季子貴之也其曰來歸喜之也○冬齊仲孫來其曰齊仲孫外之也其不目而曰仲孫疏之也其言齊以累桓也

二年春王正月齊人遷陽○夏五月乙酉吉禘于莊公吉禘者不吉者也喪事未畢而舉吉祭故非之也○秋八月辛丑公薨不地故也其不書葬不以討母葬子也○九月夫人姜氏孫于邾孫之爲言猶孫也諱奔也○公子慶父出奔莒其曰出絕之也慶父不復見矣○冬齊高子來盟其曰來喜之也其曰高子貴之也盟立僖公也不言使何也不以齊侯使高子也十有二月狄入衛○鄭棄其師惡其長也兼不反其衆則是棄其師也

僖公

元年春王正月繼弑君不言卽位正也○齊師宋師曹師次于緄北救邢救不言次言次非救也非救而曰救何也遂齊侯之意也是齊侯與齊侯也何用見其是齊侯也曹無師曹師者曹伯也其不言曹伯何也以其不言齊侯不可言曹伯也其不言齊侯何也以其不足乎揚不言齊侯也○夏六月邢遷于夷儀遷者猶得其國家以往者也其地邢復見也○齊師宋師曹師城邢是向之師也使之以改事然美齊侯之功也○秋七月戊辰夫人姜氏薨于夷夫人薨不地地故也齊人以歸不言以喪

歸非以喪歸也加喪焉諱以夫人歸也其以歸葬之也○楚人伐鄭○八月公會齊侯宋公鄭伯曹伯邾人于櫟○九月公敗邾師于偃不日疑戰也疑戰而曰敗勝內也○冬十月壬午公子友帥師敗莒師于麗獲莒挈莒無大夫其曰莒挈何也以吾獲之目之也內不言獲此其言獲何也惡公子之給給者奈何公子友謂莒挈曰吾二人不相說士卒何罪屏左右而相搏公子友處下左右曰孟勞孟勞者魯之寶刀也公子友以殺之然則何以惡乎給也曰棄師之道也○十有二月丁巳夫人氏之喪至自齊其不言姜以其殺二子貶之也或曰爲齊桓諱殺同姓也

二年春王正月城楚丘楚丘者何衛邑也國而曰城此邑也其曰城何也封衛也則其不言城衛何也衛未遷也其不言衛之遷焉何也不與齊侯專封也其言城之者專辭也故非天子不得專封諸侯諸侯不得專封諸侯雖通其仁以義而不與也故曰仁不勝道○夏五月辛巳葬我小君哀姜○虞師晉師滅夏陽非國而曰滅重夏陽也虞無師其曰師何也以其先晉不可以不言師也其先晉何也爲主乎滅夏陽也夏陽者虞虢之塞邑也滅夏陽而虞虢舉矣虞之爲主乎滅夏陽何也晉獻公欲

伐虢荀息曰君何不以屈產之乘垂棘之璧而借道乎虞也公曰此晉國之寶也如受吾幣而不借吾道則如之何荀息曰此小國之所以事大國也彼不借吾道必不敢受吾幣如受吾幣而借吾道則是我取之中府而藏之外府取之中廡而置之外廡也公曰宮之奇存焉必不使受之也荀息曰宮之奇之爲人也達心而懦又少長於君達心則其言略懦則不能彊諫少長於君則君輕之且夫玩好在耳目之前而患在一國之後此中知以上乃能慮之臣料虞君中知以下也公遂借道而伐虢宮之奇諫曰晉國之使者其辭卑而幣重必不便於虞虞公弗聽遂受其幣而借之道舉虞苟息牽馬操璧而前曰璧則猶是也而馬齒加長矣○秋九月齊侯宋公江人黃人盟于貫貫之盟不期而至者江人黃人也江人黃人者遠國之辭也中國稱齊宋遠國稱江黃以爲諸侯皆來至也○冬十月不雨不雨者勤雨也○楚人侵鄭三年春王正月不雨不雨者勤雨也○夏四月不雨一時言不雨者閔雨也閔雨者有志乎民者也○徐人取舒○六月雨雨云者喜雨也喜雨者有志乎民者也○秋

齊侯宋公江人黃人會于陽穀陽穀之會桓公委端搢笏而朝諸侯諸侯皆諭乎桓公之志○冬公子季友如齊莅盟莅者位也其不日前定也不言及者以國與之也不言其人亦以國與之也○楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰潰之爲言上下不相得也侵淺事也侵蔡而蔡潰以桓公爲知所侵也不土其地不分其民明正也遂伐楚次于陘遂繼事也次止也○夏許男新臣卒諸侯死於國不地死於外地死於師何爲不地內桓師也○楚屈完來盟于師盟于召陵楚無大夫其曰屈完何也以其來會桓成之爲大夫也其不言使權在屈完也則是正乎曰非正也以其來會諸侯重之也來者何內桓師也于師前定也于召陵得志乎桓公也得志者不得志也以桓公得志爲僅矣屈完曰大國之以兵向楚何也桓公曰昭王南征不反菁茅之貢不至故周室不祭屈完曰菁茅之貢不至則諾昭王南征不反我將問諸江○齊人執陳袁濤塗齊人者齊侯也其人之何也於是哆然外齊侯也不正其踰國而執也○秋及江人黃人伐陳不言其人及之者何內師也○八月公至自伐楚有二

事偶則以後事致後事小則以先事致其以伐楚致大伐楚也○葬許穆公○冬十有二月公孫茲帥師會齊人宋人衛人鄭人許人曹人侵陳

五年春晉侯殺其世子申生目晉侯序殺惡晉侯也○杞伯姬來朝其子婦人既嫁不踰竟踰竟非正也諸侯相見曰朝伯姬爲志乎朝其子也伯姬爲志乎朝其子則是杞伯失夫之道矣諸侯相見曰朝以待人父之道待人之子非正也故曰杞伯姬來朝其子參譏也○夏公孫茲如牟○公及齊侯宋公陳侯衛侯鄭伯許男曹伯會王世子于首戴及以會尊之也何尊焉王世子云者唯王之貳也云可以重之存焉尊之也何重焉天子世子世天下也○秋八月諸侯盟于首戴無中事而復舉諸侯何也尊王世子而不敢與盟也尊則其不敢與盟何也盟者不相信也故謹信也不敢以所不信而加之尊者桓諸侯也不能朝天子是不臣也王世子子也塊然受諸侯之尊己而立乎其位是不子也桓不臣王世子不子則其所善焉何也是則變之正也天子微諸侯不享覲桓控大國扶小國統諸侯不能以朝天子亦不敢致天王尊王世子于首戴乃所以尊天王之命也世子含王命會齊桓亦所以尊天王之命

也世子受之可乎是亦變之正也天子徵諸侯不享觀世子受諸侯之尊已而天王尊矣世子受之可也鄭伯逃歸不盟以其去諸侯故逃之也○楚人滅弦弦子奔黃弦國也其不日徵國也○九月戊申朔日有食之○冬晉人執虞公執不言所於地繼於晉也其曰公何也猶曰其下執之之辭也其猶下執之之辭何也晉命行乎虞民矣虞虢之相救非相爲賜也今日亡虢而明日亡虞矣

六年春王正月○夏公會齊侯宋公陳侯衛侯曹伯伐鄭圍新城伐國不言圍邑此其言圍何也病鄭也著鄭伯之罪也○秋楚人圍許諸侯遂救許善救許也○冬公至自伐鄭其不以救許致何也大伐鄭也

七年春齊人伐鄭○夏小邾子來朝○鄭殺其大夫申侯稱國以殺大夫殺無罪也○秋七月公會齊侯宋公陳世子款鄭世子華盟于寧母衣裳之會也○曹伯班卒○公子友如齊○冬葬曹昭公

八年春王正月公會王人齊侯宋公衛侯許男曹伯陳世子款盟于洮王人之先諸侯何也賈王命也朝服雖敵必加於上弁冕雖舊必加於首周室雖衰必先諸侯兵

車之會也鄭伯乞盟以向之逃歸乞之也乞者重辭也重是盟也乞者處其所而請與也蓋洵之也○夏狄伐晉○秋七月禘于大廟用致夫人用者不宜用者也致者不宜致者也言夫人必以其氏姓言夫人而不以氏姓非夫人也立妾之辭也非正也夫人之我可以不夫人之乎夫人卒葬之我可以不卒葬之乎一則以宗廟臨之而後貶焉一則以外之弗夫人而見正焉○冬十有二月丁未天王崩

九年春王三月丁丑宋公禦說卒○夏公會宰周公齊侯宋子衛侯鄭伯許男曹伯于葵丘天子之宰通于四海宋其稱子何也未葬之辭也禮柩在堂上孤無外事令背殯而出會以宋子爲無哀矣○秋七月乙酉伯姬卒內女也未適人不卒此何以卒也許嫁笄而字之死則以成人之喪治之○九月戊辰諸侯盟于葵丘桓盟不日此何以日美之也爲見天子之禁故備之也葵丘之會陳牲而不殺讀書加于牲上壹明天子之禁曰毋雍泉毋訖糴毋易樹子毋以妾爲妻毋使婦人與國事○甲子晉侯詭諸卒○冬晉里克殺其君之子奚齊其君之子云者國人不子也國人不子何也不正其殺世子申生而立之也

十年春王正月公如齊○狄滅溫溫子奔衛○晉里克弑其君卓及其大夫荀息以尊及卑也荀息閑也○夏齊侯許男伐北戎○晉殺其大夫里克稱國以殺罪累上也里克弑二君與一大夫其以累上之辭言之何也其殺之不以其罪也其殺之不以其罪奈何里克所爲殺者爲重耳也夷吾曰是又將殺我乎故殺之不以其罪也其爲重耳弑奈何晉獻公伐虢得麗姬獻公私之有二子長曰奚齊稚曰卓子麗姬欲爲亂故謂君曰吾夜者夢夫人趨而來曰吾苦畏胡不使大夫將衛士而衛冢乎公曰孰可使曰臣莫尊於世子則世子可故君謂世子曰麗姬夢夫人趨而來曰吾苦畏女其將衛士而往衛冢乎世子曰敬諾築宮宮成麗姬又曰吾夜者夢夫人趨而來曰吾苦飢世子之宮已成則何爲不使祠也故獻公謂世子曰其祠世子祠已祠致福於君君田而不在麗姬以酖爲酒藥脯以毒獻公田來麗姬曰世子已祠故致福於君君將食麗姬跪曰食自外來者不可不試也覆酒於地而地實以脯與犬犬死麗姬下堂而啼呼曰天乎天乎國子之國也子何遲於爲君君喟然歎曰吾與女未有過切是何與我之深也使人謂世子曰爾其圖之世子之傅里克謂世子曰

入自明入自明則可以生不入自明則不可以生世子曰吾君已老矣已昏矣吾若此而入自明則麗姬必死麗姬死則吾君不安所以使吾君不安者吾不若自死吾寧自殺以安吾君以重耳爲寄矣刎脰而死故里克所爲弑者爲重耳也夷吾曰是又將殺我也○秋七月○冬大雨雪

十有一年春晉殺其大夫平鄭父稱國以殺罪累上也○夏公及夫人姜氏會齊侯于陽穀○秋八月大雩雩月正也雩得雨曰雩不得雨曰旱○冬楚人伐黃

十有二年春王正月庚午日有食之○夏楚人滅黃貫之盟管仲曰江黃遠齊而近楚楚爲利之國也若伐而不能救則無以宗諸侯矣桓公不聽遂與之盟管仲死楚伐江滅黃桓公不能救故君子閔之也○秋七月○冬十有二月丁丑陳侯杵臼卒十有三年春狄侵衛○夏四月葬陳宣公○公會齊侯宋公陳侯衛侯鄭伯許男曹伯于鹹兵車之會也○秋九月大雩○冬公子友如齊

十有四年春諸侯城緣陵其曰諸侯散辭也聚而曰散何也諸侯城有散辭也桓德衰矣○夏六月季姬及緡子遇于防使緡子來朝遇者同謀也來朝者來請己也朝

不言使言使非正也以病繒子也○秋八月辛卯沙鹿崩林屬於山爲鹿沙山名也無崩道而崩故志之也其日重其變也○狄侵鄭○冬蔡侯肸卒諸侯時卒惡之也十有五年春王正月公如齊○楚人伐徐○三月公會齊侯宋公陳侯衛侯鄭伯許男曹伯盟于牡丘兵車之會也遂次于匡遂繼事也次止也有畏也○公孫敖帥師及諸侯之大夫救徐善救徐也○夏五月日有食之○秋七月齊師曹師伐厲○八月螽蟲災也甚則月不甚則時○九月公至自會○季姬歸于繒○己卯晦震夷伯之廟晦冥也震雷也夷伯魯大夫也因此以見天子至于士皆有廟天子七廟諸侯五大夫三十二故德厚者流光德薄者流卑是以貴始德之本也始封必爲祖○冬宋人伐曹○楚人敗徐于婁林夷狄相敗志也○十有一月壬戌晉侯及秦伯戰于韓獲晉侯韓之戰晉侯失民矣以其民未敗而君獲也

十有六年春王正月戊申朔隕石于宋五先隕而後石何也隕而後石也于宋四竟之內曰宋後數散辭也耳治也○是月六鷓退飛過宋都是月也決不日而月也六鷓退飛過宋都先數聚辭也目治也子曰石無知之物鷓微有知之物石無知故日

之鵠微有知之物故月之君子之於物無所苟而已石鵠且猶盡其辭而況於人乎故五石六鵠之辭不設則王道不亢矣民所聚曰都○三月壬申公子季友卒大夫日卒正也稱公弟叔仲賢也大夫不言公子公孫疏之也○夏四月丙申緡季姬卒○秋七月甲子公孫茲卒大夫日卒正也○冬十有二月公會齊侯宋公陳侯衛侯鄭伯許男邢侯曹伯于淮兵車之會也

十有七年春齊人徐人伐英氏○夏滅項孰滅之桓公也何以不言桓公也爲賢者諱也項國也不可滅而滅之乎桓公知項之可滅也而不知己之不可以滅也既滅人之國矣何賢乎君子惡惡疾其始善善樂其終桓公嘗有存亡繼絕之功故君子爲之諱也○秋夫人姜氏會齊侯于卞○九月公至自會○冬十有二月乙亥齊侯小白卒此不正其日之何也其不正前見矣其不正之前見何也以不正入虛國故稱嫌焉爾

十有八年春王正月宋公曹伯衛人邾人伐齊非伐喪也○夏師救齊善救齊也○五月戊寅宋師及齊師戰于鹹齊師敗績戰不言伐客不言及言及惡宋也○狄救

齊善救齊也○秋八月丁亥葬齊桓公○冬邢人狄人伐衛狄其稱人何也善累而後進之伐衛所以救齊也功近而德遠矣

十有九年春王三月宋人執滕子嬰齊○夏六月宋公曹人邾人盟于曹南緄子會盟于邾己酉邾人執緄子用之微國之君因邾以求與之盟人因己以求與之盟己迎而執之惡之故謹而日之也用之者叩其鼻以蟬社也○秋宋人圍曹○衛人伐邢○冬會陳人蔡人楚人鄭人盟于齊○梁亡自亡也涵於酒淫於色心昏耳目塞上無正長之治大臣背叛民爲寇盜梁亡自亡也如加力役焉涵不足道也梁亡鄭棄其師我無加損焉正名而已矣梁亡出惡正也鄭棄其師惡其長也

二十年春新作南門作爲也有加其度也言新有故也非作也南門者法門也○夏郟子來朝○五月己巳西宮災謂之新宮則近爲禰宮以謚言之則如疏之然以是爲閔宮也○鄭人入滑○秋齊人狄人盟于邢邢爲主焉爾邢小其爲主何也其爲主乎救齊○冬楚人伐隨隨國也

二十有一年春狄侵衛○宋人齊人楚人盟于鹿上○夏大旱旱時正也○秋宋公

楚子陳侯蔡侯鄭伯許男曹伯會于雩執宋公以伐宋以重辭也○冬公伐邾○楚人使宜申來獻捷捷軍得也其不曰宋捷何也不與楚捷於宋也○十有二月癸丑公會諸侯盟于薄會者外爲主焉爾釋宋公外釋不志此其志何也以公之與之盟目之也不言楚不與楚專釋也

二十二年春公伐邾取須句○夏宋公衛侯許男滕子伐鄭○秋八月丁未及邾人戰于升陘內諱敗舉其可道者也不言其人以吾敗也不言及之者爲內諱也○冬十有一月己巳朔宋公及楚人戰于泓宋師敗績日事遇朔曰朔春秋三十有四戰未有以尊敗乎卑以師敗乎人者也以尊敗乎卑以師敗乎人則驕其敵襄公以師敗乎人而不驕其敵何也責之也泓之戰以爲復雩之恥也雩之恥宋襄公有以自取之伐齊之喪執滕子圍曹爲雩之會不顧其力之不足而致楚成王成王怒而執之故曰禮人而不荅則反其敬愛人而不親則反其仁治人而不治則反其知過而不改又之是謂之過襄公之謂也古者被甲嬰冑非以興國也則以征無道也豈曰以報其恥哉宋公與楚人戰于泓水之上司馬子反曰楚衆我少鼓險而擊之勝無

幸焉襄公曰君子不推人危不攻人厄須其出旣出旌亂於上陳亂於下子反曰楚衆我少擊之勝無幸焉襄公曰不鼓不成列須其成列而後擊之則衆敗而身傷焉七月而死倍則攻敵則戰少則守人之所以爲人者言也人而不能言何以爲人言之所以爲言者信也言而不信何以爲言信之所以爲信者道也信而不道何以爲道道之貴者時其行勢也

二十有三年春齊侯伐宋圍閔伐國不言圍邑此其言圍何也不正其以惡報惡也○夏五月庚寅宋公茲父卒茲父之不葬何也失民也其失民何也以其不教民戰則是棄其師也爲人君而棄其師其民孰以爲君哉○秋楚人伐陳○冬十有一月杞子卒

二十有四年春王正月○夏狄伐鄭○秋七月○冬天王出居于鄭天子無出出失天下也居者居其所也雖失天下莫敢有也○晉侯夷吾卒

二十五年春王正月丙午衛侯燬滅邢燬之名何也不正其伐本而滅同姓也○夏四月癸酉衛侯燬卒○宋蕩伯姬來逆婦婦人旣嫁不踰竟宋蕩伯姬來逆婦非正

也其曰婦何也緣姑言之之辭也○宋殺其大夫其不稱名姓以其在祖之位尊之也○秋楚人圍陳納頓子于頓納者內弗受也圍一事也納一事也而遂言之蓋納頓子者陳也○葬衛文公○冬十有二月癸亥公會衛子莒慶盟于洮莒無大夫其曰莒慶何也以公之會目之也

二十有六年春王正月己未公會莒子衛甯速盟于向公不會大夫其曰甯速何也以其隨莒子可以言會也○齊人侵我西鄙公追齊師至嵩弗及人微者也侵淺事也公之追之非正也至嵩急辭也弗及者弗與也可以及而不敢及也其侵也曰人其追也曰師以公之弗及大之也弗及內辭也○夏齊人伐我北鄙○衛人伐齊○公子遂如楚乞師乞重辭也何重焉重人之死也非所乞也師出不必反戰不必勝故重之也○秋楚人滅夔以夔子歸夔國也不日微國也以歸猶愈乎執也○冬楚人伐宋圍閔伐國不言圍邑此其言圍何也以吾用其師目其事也非道用師也公以楚師伐齊取穀以者不以其死非其正也公至自伐齊惡事不致此其致之何也危之也

二十有七年春杞子來朝○夏六月庚寅齊侯昭卒○秋八月乙未葬齊孝公○乙巳公子遂帥師入杞○冬楚人陳侯蔡侯鄭伯許男圍宋楚人者楚子也其曰人何也人楚子所以人諸侯也其人諸侯何也不正其信夷狄而伐中國也○十有二月甲戌公會諸侯盟于宋

二十有八年春晉侯侵曹晉侯伐衛再稱晉侯忌也○公子買戍衛不卒戍刺之先名後刺殺有罪也公子啟曰不卒戍者可以卒也可以卒而不卒譏在公子也刺之可也○楚人救衛○三月丙午晉侯入曹執曹伯畀宋人入者內弗受也日入惡人者也以晉侯而斥執曹伯惡晉侯也畀與也其曰人何也不以晉侯畀宋公也○夏四月己巳晉侯齊師宋師秦師及楚人戰于城濮楚師敗績○楚殺其大夫得臣○衛侯出奔楚○五月癸丑公會晉侯齊侯宋公蔡侯鄭伯衛子莒子盟于踐土諱會天王也陳侯如會如會外乎會也於會受命也○公朝于王所朝不言所言所者非其所也○六月衛侯鄭自楚復歸于衛自楚楚有奉焉爾復者復中國也歸者歸其所也鄭之名失國也○衛元咺出奔晉○陳侯款卒○秋杞伯姬來○公子遂如齊

○冬公會晉侯宋公蔡侯鄭伯陳子莒子邾子秦人于溫諱會天王也○天王守于河陽全天王之行也爲若將守而遇諸侯之朝也爲天王諱也水北爲陽山南爲陽溫河陽也壬申公朝于王所朝於廟禮也於外非禮也獨公朝與諸侯盡朝也其日以其再致天子故謹而日之主善以內目惡以外言曰公朝逆辭也而尊天子會于溫言小諸侯溫河北地以河陽言之大天子也日繫於月月繫於時壬申公朝于王所其不月失其所繫也以爲晉文公之行事爲已慎矣○晉人執衛侯歸之于京師此入而執其不言入何也不外王命於衛也歸之于京師緩辭也斷在京師也○衛元咺自晉復歸于衛自晉晉有奉焉爾復者復中國也歸者歸其所也○諸侯遂圍許遂繼事也○曹伯襄復歸于曹復者復中國也天子免之因與之會其曰復通王命也遂會諸侯圍許遂繼事也

二十有九年春介葛盧來介國也葛盧微國之君未爵者也其曰來卑也○公至自圍許○夏六月公會王人晉人宋人齊人陳人蔡人秦人盟于翟泉○秋大雨雹○冬介葛盧來

三十年春王正月○夏狄侵齊○秋衛殺其大夫元咺稱國以殺罪累上也以是爲訟君也衛侯在外其以累上之辭言之何也待其殺而後入也及公子瑕公子瑕累也以尊及卑也○衛侯鄭歸于衛○晉人秦人圍鄭○介人侵蕭○冬天王使宰周公來聘天子之宰通於四海○公子遂如京師遂如晉以尊遂乎卑此言不敢叛京師也

三十有一年春取濟西田○公子遂如晉○夏四月四卜郊不從乃免牲猶三望夏四月不時也四卜非禮也免牲者爲之緇衣熏裳有司玄端奉送至于南郊免牛亦然乃者亡乎人之辭也猶者可以已之辭也○秋七月○冬杞伯姬來求婦婦人旣嫁不踰竟杞伯姬來求婦非正也○狄圍衛○十有二月衛遷於帝丘

三十有二年春王正月○夏四月己丑鄭伯捷卒○衛人侵狄○秋衛人及狄盟○冬十有二月己卯晉侯重耳卒

三十有三年春王二月秦人入滑滑國也○齊侯使國歸父來聘○夏四月辛巳晉人及姜戎敗秦師于殺不言戰而言敗何也狄秦也其狄之何也秦越千里之險入

虛國進不能守退敗其師徒亂人子女之教無男女之別秦之爲狄自殺之戰始也
秦伯將襲鄭百里子與蹇叔子諫曰千里而襲人未有不亡者也秦伯曰子之冢木
已拱矣何知師行百里子與蹇叔子送其子而戒之曰女死必於殺之巖陰之下我
將尸女於是師行百里子與蹇叔子隨其子而哭之秦伯怒曰何爲哭吾師也二子
曰非敢哭師也哭吾子也我老矣彼不死則我死矣晉人與姜戎要而擊之殺匹馬
倚輪無反者晉人者晉子也其曰人何也微之也何爲微之不正其釋殯而主乎戰
也○癸巳葬晉文公曰葬危不得葬也○狄侵齊○公伐邾取訾樓○秋公子遂帥
師伐邾○晉人敗狄于箕○冬十月公如齊十有二月公至自齊○乙巳公薨于小
寢小寢非正也○隕霜不殺草未可殺而殺舉重也可殺而不殺舉輕也○李梅實
實之爲言猶實也○晉人陳人鄭人伐許

文公

元年春王正月公卽位繼正卽位正也○二月癸亥日有食之○天王使叔服來會
葬葬曰會其志重天子之禮也○夏四月丁巳葬我君僖公薨稱公舉上也葬我君

接上下也僖公葬而後舉諡諡所以成德也於卒事乎加之矣○天王使毛伯來錫公命禮有受命無來錫命錫命非正也○晉侯伐衛○叔孫得臣如京師○衛人伐晉○秋公孫敖會晉侯于戚○冬十月丁未楚世子商臣弑其君髡日髡之卒所以謹商臣之弑也夷狄不言正不正○公孫敖如齊

二年春王二月甲子晉侯及秦師戰于彭衙秦師敗績○丁丑作僖公主作爲也爲僖公主也立主喪主於虞吉主於練作僖公主譏其後也作主壞廟有時日於練焉壞廟壞廟之道易檐可也改塗可也○三月乙巳及晉處父盟不言公處父仇也爲公諱也何以知其與公盟以其日也何以不言公之如晉所恥也出不書反不致也○夏六月公孫敖會宋公陳侯鄭伯晉士穀盟于垂斂內大夫可以會外諸侯○自十有二月不雨至于秋七月歷時而言不雨文不憂雨也不憂雨者無志乎民也○八月丁卯大事于大廟躋僖公大事者何大是事也著禘嘗禘祭者毀廟之主陳于大祖未毀廟之主皆升合祭於大祖躋升也先親而後祖也逆祀也逆祀則是無昭穆也無昭穆則是無祖也無祖則無天也故日文無天無天者是無天而行也君子

不以親親害尊尊此春秋之義也○冬晉人宋人陳人鄭人伐秦○公子遂如齊納幣

三年春王正月叔孫得臣會晉人宋人陳人衛人鄭人伐沈沈潰○夏五月王子虎卒叔服也此不卒者也何以卒之以其來會葬我卒之也或曰以其嘗執重以守也○秦人伐晉○秋楚人圍江○雨蝨于宋外災不志此何以志也曰災甚也其甚奈何茅茨盡矣著於上見於下謂之雨○冬公如晉○十有二月己巳公及晉侯盟○晉陽處父帥師伐楚救江此伐楚其言救江何也江遠楚近伐楚所以救江也

四年春公至自晉○夏逆婦姜于齊其曰婦姜爲其禮成乎齊也其逆者誰也親逆而稱婦或者公與何其速婦之也曰公也其不言公何也非成禮於齊也曰婦有姑之辭也其不言氏何也貶之也何爲貶之也夫人與有貶也○狄侵齊○秋楚人滅江○晉侯伐秦○衛侯使甯俞來聘○冬十有一月壬寅夫人風氏薨

五年春王正月王使榮叔歸舍且貺舍一事也貺一事也兼歸之非正也其曰且志兼也其不言來不周事之用也貺以早而舍已晚○三月辛亥葬我小君成風王使

毛伯來會葬會葬之禮於鄙上○夏公孫敖如晉○秦人入郟○秋楚人滅六○冬十月甲申許男業卒

六年春葬許僖公○夏季孫行父如陳○秋季孫行父如晉○八月乙亥晉侯驩卒○冬十月公子遂如晉○葬晉襄公○晉殺其大夫陽處父稱國以殺罪累上也襄公已葬其以累上之辭言之何也君漏言也上泄則下闇下闇則上聾且闇且聾無以相通射姑殺者也射姑之殺奈何曰晉將與狄戰使狐夜姑爲將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰吾始使盾佐女今女佐盾矣夜姑曰敬諾襄公死處父主竟上事射姑使人殺之君漏言也故士造辟而言詭辭而出曰用我則可不用我則無亂其德○晉狐夜姑出奔狄○閏月不告月猶朝于廟不告月者何也不告朔也不告朔則何爲不言朔也閏月者附月之餘日也積分而成於月者也天子不以告朔而喪事不數也猶之爲言可以已也

七年春公伐邾三月甲戌取須句取邑不日此其日何也不正其再取故謹而日之

也遂城郟遂繼事也○夏四月宋公壬臣卒○宋人殺其大夫稱人以殺誅有罪也
○戊子晉人及秦人戰于令狐晉先蔑奔秦不言出在外也輟戰而奔秦以是爲逃
軍也○狄侵我西鄙○秋八月公會諸侯晉大夫盟于扈其曰諸侯略之也○冬徐
伐莒○公孫敖如莒莅盟莅位也其曰位何也前定也其不日前定之盟不日也
八年春王正月○夏四月○秋八月戊申天王崩○冬十月壬午公子遂會晉趙盾
盟于衡雍○乙酉公子遂會雒戎盟于暴○公孫敖如京師不至而復丙戌奔莒不
言所至未如也未如則未復也未如而曰如不廢君命也未復而曰復不專君命也
其如非如也其復非復也唯奔莒之爲信故謹而日之也○螽○宋人殺其大夫司
馬司馬官也其以官稱無君之辭也○宋司城來奔司城官也其以官稱無君之辭
也來奔者不言出舉其接我也

九年春毛伯來求金求車猶可求金甚矣○夫人姜氏如齊○二月叔孫得臣如京
師京大也師衆也言周必以衆與大言之也○辛丑葬襄王天子志崩不志葬舉天
下而葬一人其道不疑也志葬危不得葬也日之甚矣其不葬之辭也○晉人殺其

大夫先都○三月夫人姜氏至自齊卑以尊致病文公也○晉人殺其大夫士穀及箕鄭父稱人以殺誅有罪也鄭父累也○楚人伐鄭○公子遂會晉人宋人衛人許人救鄭○夏狄侵齊○秋八月曹伯襄卒○九月癸酉地震震動也地不震者也震故謹而日之也○冬楚子使蔣來聘楚無大夫其曰蔣何也以其來我喪之也○秦人來歸僖公成風之襪秦人弗夫人也卽外之弗夫人而見正焉○葬曹共公

十年春王三月辛卯臧孫辰卒○夏秦伐晉○楚殺其大夫宜申○自正月不雨至于秋七月歷時而言不雨文不閔雨也不閔雨者無志乎民也○及蘇子盟于女粟○冬狄侵宋○楚子蔡侯次于厥貉

十有一年春楚子伐麇○夏叔彭生會晉卻缺于承匡○秋曹伯來朝○公子遂如宋○狄侵齊○冬十月甲午叔孫得臣敗狄于鹹不言帥師而言敗何也直敗一人之辭也一人而曰敗何也以衆焉言之也傳曰長狄也弟兄三人侏宥中國瓦石不能害叔孫得臣最善射者也射其目身橫九畝斷其首而載之眉見於軾然則何爲不言獲也曰古者不重創不禽二毛故不言獲爲內諱也其之齊者王子成父殺之

則未知其之晉者也

十有二年春王正月郟伯來奔○杞伯來朝○二月庚子子叔姬卒其曰子叔姬貴也公之母姊妹也其一傳曰許嫁以卒之也男子二十而冠冠而列丈夫三十而娶女子十五而許嫁二十而嫁○夏楚人圍巢○秋滕子來朝○秦伯使術來聘○冬十有二月戊午晉人秦人戰于河曲不言及秦晉之戰已亟故略之也○季孫行父帥師城諸及鄆稱帥師言有難也

十有三年春王正月○夏五月壬午陳侯朔卒○邾子籛條卒○自正月不雨至于秋七月○大室屋壞大室屋壞者有壞道也譏不脩也大室猶世室也周公曰大廟伯禽曰大室羣公曰宮禮宗廟之事君親割夫人親春敬之至也爲社稷之主而先君之廟壞極稱之志不敬也○冬公如晉○衛侯會公于沓○狄侵衛○十有二月己丑公及晉侯盟還自晉還者事未畢也自晉事畢也○鄭伯會公于棗

十有四年春王正月公至自晉○邾人伐我南鄙○叔彭生帥師伐邾○夏五月乙亥齊侯潘卒○六月公會宋公陳侯衛侯鄭伯許伯曹伯晉趙盾癸酉同盟于新城

同者有同也同外楚也○秋七月有星孛入于北斗孛之爲言猶彗也其曰入北斗斗有環域也○公至自會○晉人納撻菑于邾弗克納是郤克也其曰人何也微之也何爲微之也長穀五百乘絲地千里過宋鄭滕薛魯入千乘之國欲變人之主至城下然後知何知之晚也弗克納未伐而曰弗克何也弗克其義也撻菑晉出也獲且齊出也獲且正也撻菑不正也○九月甲申公孫敖卒于齊奔大夫不言卒而言卒何也爲受其喪不可不卒也其地於外也○齊公子商人弑其君舍舍未踰年其曰君何也成舍之爲君所以重商人之弑也商人其不以國氏何也不以嫌代嫌也舍之不日何也未成爲君也○宋子哀來奔其曰子哀失之也○冬單伯如齊齊人執單伯私罪也單伯淫于齊齊人執之齊人執子叔姬叔姬同罪也

十有五年春季孫行父如晉○三月宋司馬華孫來盟司馬官也其以官稱無君之辭也來盟者何前定也不言及者以國與之也○夏曹伯來朝○齊人歸公孫敖之喪○六月辛丑朔日有食之鼓用牲于社○單伯至自齊大夫執則致致則名此其不名何也天子之命大夫也○晉卻缺帥師伐蔡戊申入蔡○秋齊人侵我西鄙其

曰鄙遠之也其遠之何也不以難介我國也○季孫行父如晉○冬十有一月諸侯盟于扈○十有二月齊人來歸子叔姬其曰子叔姬貴之也其言來歸何也父母之於子雖有罪猶欲其免也○齊侯侵我西鄙遂伐曹入其郛

十有六年春季孫行父會齊侯于陽穀齊侯弗及盟弗及者內辭也行父失命矣齊得內辭也○夏五月公四不視朔天子告朔于諸侯諸侯受乎禰廟禮也公四不視朔公不臣也以公爲厭政以甚矣○六月戊辰公子遂及齊侯盟于師丘復行父之盟也○秋八月辛未夫人姜氏薨○毀泉臺喪不貳事貳事緩喪也以文爲多失道矣自古爲之今毀之不如勿處而已矣○楚人秦人巴人滅庸○冬十有一月宋人弑其君杵臼

十有七年春晉人衛人陳人鄭人伐宋○夏四月癸亥葬我小君聲姜○齊侯伐我西鄙○六月癸未公及齊侯盟于穀○諸侯會于扈○秋公至自穀○冬公子遂如齊

十有八年春王二月丁丑公薨于臺下臺下非正也○秦伯罃卒○夏五月戊戌齊

人弑其君商人○六月癸酉葬我君文公○秋公子遂叔孫得臣如齊使舉上客而不稱介不正其同倫而相介故列而數之也○冬十月子卒卒不日故也○夫人姜氏歸于齊惡宣公也有不待貶絕而罪惡見者有待貶絕而惡從之者姪娣者不孤子之意也一人有子三人緩帶一曰就賢也○季孫行父如齊○莒弑其君庶其

宣公

元年春王正月公卽位繼故而言卽位與聞乎故也○公子遂如齊逆女三月遂以夫人婦姜至自齊其不言氏喪未畢故略之也其曰婦緣姑言之之辭也遂之挈由上致之也○夏季孫行父如齊○晉放其大夫胥甲父于衛放猶屏也稱國以放放無罪也○公會齊侯于平州○公子遂如齊○六月齊人取濟西田內不言取言取授之也以是爲賂齊也○秋邾子來朝○楚子鄭人侵陳遂侵宋遂繼事也○晉趙盾帥師救陳善救陳也○宋公陳侯衛侯曹伯會晉師于棗林伐鄭列數諸侯而會晉趙盾大趙盾之事也其曰師何也以其大之也于棗林地而後伐鄭疑辭也此其地何則著其美也○冬晉趙穿帥師侵崇○晉人宋人伐鄭伐鄭所以救宋也

二年春王二月壬子宋華元帥師及鄭公子歸生帥師戰于大棘宋師敗績獲宋華元獲者不與之辭也言盡其衆以救其將也以三軍敵華元華元雖獲不病矣○秦師伐晉○夏晉人衛人陳人侵鄭○秋九月乙丑晉趙盾弑其君夷臯穿弑也盾不弑而曰盾弑何也以罪盾也其以罪盾何也曰靈公朝諸大夫而暴彈之觀其辟丸也趙盾入諫不聽出亡至於郊趙穿弑公而後反趙盾史狐書賊曰趙盾弑公盾曰天乎天乎予無罪孰爲盾而忍弑其君者乎史狐曰子爲正卿入諫不聽出亡不遠君弑反不討賊則志同志同則書重非子而誰故書之曰晉趙盾弑其君夷臯者過在下也曰於盾也見忠臣之至於許世子止見孝子之至○冬十月乙亥天王崩

三年春王正月郊牛之口傷之口緩辭也傷自牛作也改卜牛牛死乃不郊事之變也乃者亡乎人之辭也猶三望○葬匡王○楚子伐陸渾戎○夏楚人侵鄭○秋赤狄侵齊○宋師圍曹○冬十月丙戌鄭伯蘭卒○葬鄭穆公

四年春王正月公及齊侯平莒及邾莒人不肯及者內爲志焉爾平者成也不肯者

可以肯也公伐莒取向伐猶可取向莒矣莒人辭不受治也伐莒義兵也取向非也乘義而爲利也○秦伯稻卒○夏六月乙酉鄭公子歸生弑其君夷○赤狄侵齊○秋公如齊公至自齊○冬楚子伐鄭

五年春公如齊○夏公至自齊○秋九月齊高固來逆子叔姬諸侯之嫁子於大夫主大夫以與之來者接內也不正其接內故不與夫婦之稱也○叔孫得臣卒○冬齊高固及子叔姬來及者及吾子叔姬也爲使來者不使得歸之意也楚人伐鄭六年春晉趙盾衛孫免侵陳此帥師也其不言帥師何也不正其敗前事故不與帥師也○夏四月○秋八月螽○冬十月

七年春衛侯使孫良夫來盟來盟前定也不言及者以國與之不言其人亦以國與之不日前定之盟不日○夏公會齊侯伐萊○秋公至自伐萊○大旱○冬公會晉侯宋公衛侯鄭伯曹伯于黑壤

八年春公至自會○夏六月公子遂如齊至黃乃復乃者亡乎人之辭也復者事畢也不專公命也○辛巳有事于大廟仲遂卒于垂爲若反命而後卒也此公子也其

曰仲何也疏之也何爲疏之也是不卒者也不疏則無用見其不卒也則其卒之何也
也以譏乎宣也其譏乎宣何也聞大夫之喪則去樂卒事壬午猶釋猶者可以已之
辭也釋者祭之日日之享賓也萬入去籥以其爲之變譏之也○戊子夫人熊氏薨
○晉師白狄伐秦○楚人滅舒鄆○秋七月甲子日有食之既○冬十月己丑葬我
小君頃熊雨不克葬既既有日不爲雨止禮也雨不克葬喪不以制也庚寅日中而
克葬而緩辭也足乎日之辭也○城平陽○楚師伐陳

九年春王正月公如齊○公至自齊○夏仲孫蔑如京師○齊侯伐萊○秋取根牟
○八月滕子卒○九月晉侯宋公衛侯鄭伯曹伯會十扈○晉荀林父帥師伐陳○
辛酉晉侯黑臀卒于扈其地於外也其日未踰竟也○冬十月癸酉衛侯鄭卒○宋
人圍滕○楚子伐鄭○晉郤缺帥師救鄭○陳殺其大夫泄冶稱國以殺其大夫殺
無罪也泄冶之無罪如何陳靈公通于夏徵舒之家公孫寧儀行父亦通其家或衣
其衣或衷其襦以相戲於朝泄冶聞之人諫曰使國人聞之則猶可使仁人聞之則
不可君愧於泄冶不能用其言而殺之

十年春公如齊公至自齊齊人歸我濟四田公娶齊齊由以爲兄弟反之不言來公如齊受之也○夏四月丙辰日有食之○己巳齊侯元卒○齊崔氏出奔衛氏者舉族而出之之辭也○公如齊五月公至自齊○癸巳陳夏徵舒弑其君平國○六月宋師伐滕○公孫歸父如齊葬齊惠公○晉人宋人衛人曹人伐鄭○秋天王使王季子來聘其曰王季王子也其曰子尊之也聘問也○公孫歸父帥師伐邾取繹○大水○季孫行父如齊○冬公孫歸父如齊○齊侯使國佐來聘○饑○楚子伐鄭十有一年春王正月○夏楚子陳侯鄭伯盟于夷陵○公孫歸父會齊人伐莒○秋晉侯會狄于橫函不言及外狄○冬十月楚人殺陳夏徵舒此入而殺也其不言入何也外徵舒於陳也其外徵舒於陳何也明楚之討有罪也丁亥楚子入陳入者內弗受也日入惡入者何用弗受也不使夷狄爲中國也納公孫寧儀行父子陳納者內弗受也輔人之不能民而討猶可入入之國制人之上下使不得其君臣之道不可

十有二年春葬陳靈公○楚子圍鄭○夏六月乙卯晉荀林父帥師及楚子戰于郟

晉師敗績績功也功事也日其事敗也○秋七月○冬十有二月戊寅楚子滅蕭○
晉人宋人衛人曹人同盟子清丘○宋師伐陳○衛人救陳

十有三年春齊師伐莒○夏楚子伐宋○秋螽○冬晉殺其大夫先穀

十有四年春衛殺其大夫孔達○夏五月壬申曹伯壽卒○晉侯伐鄭○秋九月楚

子圍宋○葬曹文公○冬公孫歸父會齊侯于穀

十有五年春公孫歸父會楚子于宋○夏五月宋人及楚人平不者成也善其量力
而反義也人者衆辭也平稱衆上下欲之也外平不道以吾人之存焉道之也○六
月癸卯晉師滅赤狄潞氏以潞子嬰兒歸滅國有三術中國謹日卑國月夷狄不日
其曰潞子嬰兒賢也○秦人伐晉○王札子殺召伯毛伯王札子者當上之辭也殺
召伯毛伯不言其何也兩下相殺也兩下相殺不志乎春秋此其志何也矯王命以
殺之非忿怒相殺也故曰以王命殺也以王命殺則何志焉爲天下主者天也繼天
者君也君之所存者命也爲人臣而侵其君之命而用之是不臣也爲人君而失其
命是不君也君不君臣不臣此天下所以傾也○秋螽○仲孫蔑會齊高固于無婁

○初稅畝初者始也古者什一藉而不稅初稅畝非正也古者三百步爲里名曰井田井田者九百畝公田居一私田稼不善則非吏公田稼不善則非民初稅畝者非公之去公田而履畝十取一也以公之與民爲己悉矣古者公田爲居井竈葱韭盡取焉○冬蝻生蝻非災也其曰蝻非稅畝之災也○饑

十有六年春王正月晉人滅赤狄甲氏及留吁○夏成周宣榭災周災不志也其曰宣榭何也以樂器之所藏目之也○秋邾伯姬來歸○冬大有年五穀大熟爲大有年

十有七年春王正月庚子許男錫我卒○丁未蔡侯申卒○夏葬許昭公○葬蔡文公○六月癸卯日有食之○己未公會晉侯衛侯曹伯邾子同盟于斷道同者有同也同外楚也○秋公至自會○冬十有一月壬午公弟叔肸卒其曰公弟叔肸賢之也其賢之何也宣弑而非之也非之則胡爲不去也曰兄弟也何去而之與之財則曰我足矣織屨而食終身不食宣公之食君子以是爲通恩也以取貴乎春秋

十有八年春晉侯衛世子臧伐齊○公伐杞○夏四月○秋七月邾人戕繒子于繒

戕猶殘也稅殺也○甲戌楚子呂卒夷狄不卒卒少進也卒而不日日少進也日而不言正不正簡之也○公孫歸父如晉○冬十月壬戌公薨于路寢正寢也○歸父還自晉還者事未畢也自晉事畢也與人之子守其父之殯捐殯而奔其父之使者是以奔父也至檉遂奔齊遂繼事也

成公

元年春王正月公卽位○二月辛酉葬我君宣公○無冰終時無冰則志此未終時而言無冰何也終無冰矣加之寒之辭也○三月作丘甲作爲也丘爲甲也丘甲國之事也丘作甲非正也丘作甲之爲非正何也古者立國家百官具農工皆有職以事上古者有四民有士民有商民有農民有工民夫甲非人人之所能爲也丘作甲非正也○夏臧孫許及晉侯盟于赤棘○秋王師敗績于貿戎不言戰莫之敢敵也爲尊者諱敵不諱敗爲親者諱敗不諱敵尊尊親親之義也然則孰敗之晉也○冬十月季孫行父禿晉卻克眇衛孫良夫跛曹公子手僂同時而聘於齊齊使禿者御禿者使眇者御眇者使跛者御跛者使僂者御僂者蕭同姪子處臺上而笑之聞於

客客不說而去相與立胥閭而語移日不解齊人有知之者曰齊之患必自此始矣
二年春齊侯伐我北鄙○夏四月丙戌衛孫良夫帥師及齊師戰于新築衛師敗績
○六月癸酉季孫行父臧孫許叔孫僑如公孫嬰齊帥師會晉郤克衛孫良夫曹公
子手及齊侯戰于案齊師敗績其日或曰日其戰也或曰日其悉也曹無大夫其曰
公子何也以吾之四大夫在焉舉其貴者也○秋七月齊侯使國佐如師己酉及國
佐盟于爰婁婁去國五百里爰婁去國五十里壹戰絲地五百里焚雍門之茨侵車
東至海君子聞之曰夫甚甚之辭焉齊有以取之也齊之有以取之何也敗衛師于
新築侵我北鄙敖郤獻子齊有以取之也爰婁在師之外郤克曰反魯衛之侵地以
紀侯之甌來以蕭同姪子之母爲質使耕者皆東其畝然後與子盟國佐曰反魯衛
之侵地以紀侯之甌來則諾以蕭同姪子之母爲質則是齊侯之母也齊侯之母猶
晉君之母也晉君之母猶齊侯之母也使耕者盡東其畝則是終土齊也不可請壹
戰壹戰不克請再再不克請三三不克請四四不克請五五不克舉國而授於是而
與之盟○八月壬午宋公鮑卒○庚寅衛侯速卒○取汶陽田○冬楚師鄭師侵衛

○十有一月公會楚公子嬰齊于蜀楚無大夫其曰公于何也嬰齊亢也○丙申公及楚人秦人宋人陳人衛人鄭人齊人曹人邾人薛人繒人盟于蜀楚其稱人何也於是而後公得其所也會與盟同月則地會不地盟不同月則地會地盟此其地會地盟何也以公得其所申其事也今之屈向之驕也

三年春于正月公會晉侯宋公衛侯曹伯伐鄭○辛亥葬衛穆公○二月公至自伐鄭○甲子新宮災三日哭新宮者禰宮也三日哭哀也其哀禮也迫近不敢稱諡恭也其辭恭且哀以成公爲無譏矣○乙亥葬宋文公○夏公如晉○鄭公子去疾帥師伐許○公至自晉○秋叔孫僑如帥師圍棘○大雩○晉郤克衛孫良夫伐牆咎如○冬十有一月晉侯使荀庚來聘○衛侯使孫良夫來聘○丙午及荀庚盟○丁未及孫良夫盟其曰公也來聘而求盟不言及者以國與之也不言其人亦以國與之也不言求兩欲之也○鄭伐許

四年春宋公使華元來聘○三月壬申鄭伯堅卒○杞伯來朝○夏四月甲寅臧孫許卒○公如晉○葬鄭襄公○秋公至自晉○冬城郟○鄭伯伐許

五年春王正月杞叔姬來歸婦人之義嫁曰歸反曰來歸○仲孫蔑如宋○夏叔孫僑如會晉荀首于穀○梁山崩不日何也高者有崩道也有崩道則何以書也曰梁山崩壅遏河三日不流晉君召伯尊而問焉伯尊來遇輦者輦者不辟使車右而下而鞭之輦者曰所以鞭我者其取道遠矣伯尊下車而問焉曰子有聞乎對曰梁山崩壅遏河三日不流伯尊曰君爲此召我也爲之奈何輦者曰天有山天崩之天有河天壅之雖召伯尊如之何伯尊由忠問爲輦者曰君親素縞帥羣臣而哭之旣而祠焉斯流矣伯尊至君問之曰梁山崩壅遏河三日不流爲之奈何伯尊曰君親素縞帥羣臣而哭之旣而祠焉斯流矣孔子聞之曰伯尊其無績乎攘善也○秋大水○冬十一月己酉天王崩○十有二月己丑公會晉侯齊侯宋公衛侯鄭伯曹伯邾子杞伯同盟于蟲牢

六年春王正月公至自會○二月辛巳立武宮立者不宜立也○取鄆鄆國也○衛孫良夫帥師侵宋○夏六月邾子來朝○公孫嬰齊如晉○壬申鄭伯費卒○秋仲孫蔑叔孫僑如帥師侵宋○楚公子嬰齊帥師伐鄭○冬季孫行父如晉○晉欒書

帥師救鄭

七年春王正月颺鼠食郊牛角不言日急辭也過有司也郊牛日展斛角而知傷展道盡矣其所以備災之道不盡也改卜牛颺鼠又食其角又有繼之辭也其緩辭也曰亡乎人矣非人之所能也所以免有司之過也乃免牛乃者亡乎人之辭也免牲者爲之緇衣纁裳有司玄端奉送至于南郊免牛亦然免牲不曰不郊免牛亦然○吳伐鄭○夏五月曹伯來朝○不郊猶三望○秋楚公子嬰齊帥師伐鄭○公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自會○吳入州來○冬大雩雩不月而時非之也冬無爲雩也○衛孫林父出奔晉

八年春晉侯使韓穿來言汝陽之田歸之于齊于齊緩辭也不使盡我也○晉欒書帥師侵蔡○公孫嬰齊如莒○宋公使華元來聘○夏宋公使公孫壽來納幣○晉殺其大夫趙盾趙括○秋七月天子使召伯來錫公命禮有受命無來錫命錫命非正也曰天子何也曰見一稱也○冬十月癸卯杞叔姬卒○晉侯使士燮來聘○叔孫僑如會晉士燮齊人邾人伐鄭○衛人來媵媵淺事也不志此其志何也以伯姬

之不得其所故盡其事也

九年春王正月杞伯來逆叔姬之喪以歸傳曰夫無逆出妻之喪而爲之也○公會晉侯齊侯宋公衛侯鄭伯曹伯莒子杞伯同盟于蒲公至自會○二月伯姬歸于宋○夏季孫行父如宋致女致者不致者也婦人在家制於父既嫁制於夫如宋致女是以我盡之也不正故不與內稱也逆者微故致女詳其事賢伯姬也○晉人來媵媵淺事也不志此其志何也以伯姬之不得其所故盡其事也○秋七月丙子齊侯無野卒○晉人執鄭伯○晉欒書帥師伐鄭不言戰以鄭伯也爲尊者諱恥爲賢者諱過爲親者諱疾○冬十有一月葬齊頃公○楚公子嬰齊帥師伐莒庚申莒潰其日莒雖夷狄猶中國也大夫潰莒而之楚是以知其上爲事也惡之故謹而日之也○楚人入郟○秦人白狄伐晉○鄭人圍許○城中城城中城者非外民也十年春衛侯之弟黑背帥師侵鄭○夏四月五卜郊不從乃不郊夏四月不時也五卜強也乃者亡乎人之辭也○五月公會晉侯齊侯宋公衛侯曹伯伐鄭○齊人來媵○丙午晉侯孺卒○秋七月公如晉○冬十月

十有一年春王三月公至自晉○晉侯使郤犢來聘己丑及郤犢盟○夏季孫行父如晉○秋叔孫僑如如齊○冬十月

十有二年春周公出奔晉周有入無出其曰出上下一見之也言其上下之道無以存也上雖失之下孰敢有之今上下皆失之矣○夏公會晉侯衛侯于瑣澤○秋晉人敗狄于交剛中國與夷狄不言戰皆曰敗之夷狄不日○冬十月

十有三年春晉侯使郤錡來乞師乞重辭也古之人重師故以乞言之也○三月公如京師公如京師不月月非如也非如而曰如不叛京師也○夏五月公自京師遂會晉侯宋公衛侯鄭伯曹伯邾人滕人伐秦言受命不敢叛周也○曹伯廬卒于師傳曰閔之也公大夫在師曰師在會曰會○秋七月公至自伐秦○冬葬曹宣公葬時正也

十有四年春王正月莒子朱卒○夏衛孫林父自晉歸于衛○秋叔孫僑如如齊逆女○鄭公子喜帥師伐許○九月僑如以夫人婦姜氏至自齊大夫不以夫人以夫人非正也刺不親迎也僑如之挈由上致之也○冬十月庚寅衛侯臧卒○秦伯卒

十有五年春王二月葬衛定公○三月乙巳仲嬰齊卒此公孫也其曰仲何也子由父疏之也○癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于京師以晉侯而斥執曹伯惡晉侯也不言之急辭也斷在晉侯也公至自會○夏六月宋公固卒○楚子伐鄭○秋八月庚辰葬宋共公月卒日葬非葬者也此其言葬何也以其葬共姬不可不葬共公也葬共姬則其不可不葬共公何也夫人之義不踰君也爲賢者崇也○宋華元出奔晉宋華元自晉歸于宋○宋殺其大夫山○宋魚石出奔楚○冬十有一月叔孫僑如會晉士燮齊高無咎宋華元衛孫林父鄭公子鱣邾人會吳于鍾離會又會外之也○許遷于葉遷者猶得其國家以往者也其地許復見也

十有六年春王正月雨木冰雨而木冰也志異也傳曰根枝折○夏四月辛未滕子卒○鄭公孫喜帥師侵宋○六月丙寅朔日有食之○晉侯使欒黶來乞師○甲午晦晉侯及楚子鄭伯戰于鄢陵楚子鄭師敗績日事遇晦曰晦四體偏斷曰敗此其敗則目也楚不言師君重於師也○楚殺其大夫公子側○秋公會晉侯齊侯衛侯

宋華元邾人于沙隨不見公不見公者可以見公也可以見公而不見公譏在諸侯也公至自會○公會尹子晉侯齊國佐邾人伐鄭○曹伯歸自京師不言所歸歸之善者也出入不名以爲不失其國也歸爲善自某歸次之○九月晉人執季孫行父舍之于莒丘執者不舍而舍公所也執者致而不致公在也何其執而辭也猶存公也存意公亦存也公存也○冬十月乙亥叔孫僑如出奔齊○十有二月乙丑季孫行父及晉郤欒盟于扈○公至自會○乙酉刺公子偃大夫日卒正也先刺後名殺無罪也

十有七年春衛北宮括帥師侵鄭○夏公會尹子單子晉侯齊侯宋公衛侯曹伯邾人伐鄭六月乙酉同盟于柯陵柯陵之盟謀復伐鄭也○秋公至自舍不曰至自伐鄭也公不周乎伐鄭也何以知公之不周乎伐鄭以其以會致也何以知其盟復伐鄭也以其後會之人盡盟者也不周乎伐鄭則何爲日也言公之不背柯陵之盟也○齊高無咎出奔莒○九月辛丑用郊夏之始可以承春以秋之末承春之始蓋不可矣九月用郊用者不宜用也宮室不設不可以祭衣服不脩不可以祭車馬器械

不備不可以祭有司一人不備其職不可以祭祭者薦其時也薦其敬也薦其美也非享味也○晉侯使荀罃來乞師○冬公會單子晉侯宋公衛侯曹伯齊人邾人伐鄭言公不背柯陵之盟也十有一月公至自伐鄭○壬申公孫嬰齊卒于狸蜃十一月無壬申壬申乃十月也致公而後錄臣子之義也其地未踰竟也○十有二月丁巳朔日有食之○邾子貜且卒○晉殺其大夫卻錡卻擊卻至自禍於是起矣○楚人滅舒庸

十有八年春王正月晉殺其大夫胥童○庚申晉弑其君州蒲稱國以弑其君君惡甚矣○齊殺其大夫國佐○公如晉○夏楚子鄭伯伐宋○宋魚石復入于彭城○公至自晉○晉侯使士匄來聘○秋杞伯來朝○八月邾子來朝○築鹿囿築不志此其志何也山林藪澤之利所以與民共也虞之非正也○己丑公薨于路寢路寢正也男子不絕婦人之手以齊終也○冬楚人鄭人侵宋○晉侯使士魴來乞師○十有二月仲孫蔑會晉侯宋公衛侯邾子齊崔杼同盟于虛打○丁未葬我君成公

襄公

元年春王正月公卽位繼正卽位正也○仲孫蔑會晉欒黶宋華元衛甯殖曹人莒人邾人滕人薛人圍宋彭城繫彭城於宋者不與魚石正也○夏晉韓厥帥師伐鄭○仲孫蔑會齊崔杼曹人邾人杞人次于郟○秋楚公子壬夫帥師侵宋○九月辛酉天王崩○邾子來朝○冬衛侯使公孫剽來聘○晉侯使荀罃來聘

二年春王正月葬簡王○鄭師伐宋○夏五月庚寅夫人姜氏薨○六月庚辰鄭伯論卒○晉師宋師衛甯殖侵鄭其曰衛甯殖如是而稱于前事也○秋七月仲孫蔑會晉荀罃宋華元衛孫林父曹人邾人于戚○己丑葬我小君齊姜○叔孫豹如宋○冬仲孫蔑會晉荀罃齊崔杼宋華元衛孫林父曹人邾人滕人薛人小邾人于戚遂城虎牢若言中國焉內鄭也○楚殺其大夫公子申

三年春楚公子嬰齊帥師伐吳○公如晉○夏四月壬戌公及晉侯盟于長樗公至自晉○六月公會單子晉侯宋公衛侯鄭伯莒子邾子齊世子光己未同盟于雞澤同者有同也同外楚也陳侯使袁僑如會如會外乎會也於會受命也戊寅叔孫豹及諸侯之大夫及陳袁僑盟及以及與之也諸侯以爲可與則與之不可與則釋之

諸侯盟又大夫相與私盟是大夫張也故雞澤之會諸侯始失正矣大夫執國權曰
袁僑異之也○秋公至自晉○冬晉荀偃帥師伐許

四年春王三月己酉陳侯午卒○夏叔孫豹如晉○秋七月戊子夫人嬖氏薨○葬
陳成公○八月辛亥葬我小君定嬖○冬公如晉○陳人圍頓

五年春公至自晉○夏鄭伯使公子發來聘○叔孫豹繒世子巫如晉外不言如而
言如爲我事往也○仲孫蔑衛孫林父會吳于善稻吳謂善伊謂稻緩號從中國名
從主人○秋大雩○楚殺其大夫公子壬夫○公會晉侯宋公陳侯衛侯鄭伯曹伯
莒子邾子滕子薛伯齊世子光吳人繒人于戚公至自會○冬戍陳內辭也○楚公
子貞帥師伐陳○公會晉侯宋公衛侯鄭伯曹伯莒子邾子滕子薛伯齊世子光救
陳十有二月公至自救陳善救陳也○辛未季孫行父卒

六年春王三月壬午杞伯姑容卒○夏宋華弱來奔○秋葬杞桓公○滕子來朝○
莒人滅繒非滅也中國日卑國月夷狄時繒中國也而時非滅也家有旣亡國有旣
滅滅而不自知由別之而不別也莒人滅繒非滅也非立異姓以莅祭祀滅亡之道

也○冬叔孫約如邾○季孫宿如晉○十有二月齊侯滅萊

七年春邾子來朝○夏四月三卜郊不從乃免牲夏四月不時也三卜禮也乃者亡乎人之辭也○小邾子來朝○城費○秋季孫宿如衛○八月螽○冬十月衛侯使孫林父來聘壬戌及孫林父盟○楚公子貞帥師圍陳○十有二月公會晉侯宋公陳侯衛侯曹伯莒子邾子于鄆鄭伯髡原如會未見諸侯丙戌卒于操未見諸侯其曰如會何也致其志也禮諸侯不生名此其生名何也卒之名也卒之名則何爲加之如會之上見以如會卒也其見以如會卒何也鄭伯將會中國其臣欲從楚不勝其臣弑而死其不言弑何也不使夷狄之民加乎中國之君也其地於外也其日未踰竟也日卒時葬正也陳侯逃歸以其去諸侯故逃之也

八年春王正月公如晉○夏葬鄭僖公○鄭人侵蔡獲蔡公子濕人微者也侵淺事也而獲公子公子病矣○季孫宿會晉侯鄭伯齊人宋人衛人邾人于邢丘見魯之失正也公在而大夫會也○公至自晉○莒人伐我東鄙○秋九月大雩○冬楚公子貞帥師伐鄭○晉侯使士匄來聘

九年春宋災外災不志此其志何也故宋也○夏季孫宿如晉○五月辛酉夫人姜氏薨○秋八月癸未葬我小君穆姜○冬公會晉侯宋公衛侯曹伯莒子邾子滕子薛伯小邾子齊世子光伐鄭十有二月己亥同盟于戲不異言鄭善得鄭也不致恥不能據鄭也○楚子伐鄭

十年春公會晉侯宋公衛侯曹伯莒子邾子滕子薛伯杞伯小邾子齊世子光會吳于柤會又會外之也○夏五月甲午遂滅傅陽遂直遂也其曰遂何不以中國從夷狄也公至自會會夷狄不致惡事不致此其致何也存中國也中國有善事則并焉無善事則異之存之也汲鄭伯逃歸陳侯致柤之會存中國也○楚子貞鄭公孫輒帥師伐宋○晉師伐秦○秋莒人伐我東鄙○公會晉侯宋公衛侯曹伯莒子邾子齊世子光滕子薛伯杞伯小邾子伐鄭○冬盜殺鄭公子斐公子發公孫輒稱盜以殺大夫弗以上下道惡上也○戍鄭虎牢其曰鄭虎牢決鄭乎虎牢也○楚公子貞帥師救鄭○公至自伐鄭

十有一年春王正月作三軍作爲也古者天子六師諸侯一軍作三軍非正也○夏

四月四卜郊不從乃不郊夏四月不時也四卜非禮也○鄭公孫舍之帥師侵宋○公會晉侯宋公衛侯曹伯齊世子光莒子邾子滕子薛伯杞伯小邾子伐鄭○秋七月己未同盟于京城北公至自伐鄭不以後致盟後復伐鄭也○楚子鄭伯伐宋○公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于蕭魚公至自會伐而後會不以伐鄭致得鄭伯之辭也○楚人執鄭行人良宵行人者挈國之辭也○冬秦人伐晉

十有二年春王三月莒人伐我東鄙圍郟伐國不言圍邑舉重也取邑不書圍安足書也○季孫宿帥師救郟遂入郟遂繼事也受命而救郟不受命而入郟惡季孫宿也○夏晉侯使士魴來聘○秋九月吳子乘卒○冬楚公子貞帥師侵宋○公如晉十有三年春公至自晉○夏取郟○秋九月庚辰楚子審卒○冬城防

十有四年春王正月季孫宿叔老會晉士匄齊人宋人衛人鄭公孫蕞曹人莒人邾人滕人薛人杞人小邾人會吳于向○二月乙未朔日有食之○夏四月叔孫豹會晉荀偃齊人宋人衛北宮括鄭公孫蕞曹人莒人邾人滕人薛人杞人小邾人伐秦

○己未衛侯出奔齊○莠人侵我東鄙○秋楚公子貞帥師伐吳○冬季孫宿會晉士匄宋華閱衛孫林父鄭公孫董莠人邾人于戚

十有五年春宋公使向戌來聘○二月己亥及向戌盟于劉○劉夏逆王后于齊過我故志之也○夏齊侯伐我北鄙圍成○公救成至遇○季孫宿叔孫豹帥師城成郛○秋八月丁巳日有食之○邾人伐我南鄙○冬十有一月癸亥晉侯周卒

十有六年春王正月葬晉悼公○三月公會晉侯宋公衛侯鄭伯曹伯莒子邾子薛伯杞伯小邾子于澠梁戊寅大夫盟澠梁之會諸侯失正矣諸侯會而曰大夫盟正在大夫也諸侯在而不曰諸侯之大夫大夫不臣也晉人執莠子邾子以歸○齊侯伐我北鄙○夏公至自會○五月甲子地震○叔老會鄭伯晉荀偃衛甯殖宋人伐許○秋齊侯伐我北鄙圍成○大雩○冬叔孫豹如晉

十有七年春王二月庚午邾子矰卒○宋人伐陳○夏衛石買帥師伐曹○秋齊侯伐我北鄙圍桃齊高厚帥師伐我北鄙圍防○九月大雩○宋華臣出奔陳○冬邾人伐我南鄙

十有八年春白狄來○夏晉人執衛行人石買稱行人怨接於上也○秋齊侯伐我北鄙○冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊非圍而曰圍齊有大焉亦有病焉非大而足同焉諸侯同罪之也亦病矣○曹伯負芻卒于師閔之也○楚公子午帥師伐鄭

十有九年春王正月諸侯盟于祝柯晉人執邾子公至自伐齊春秋之義已伐而盟復伐者則以伐致盟不復伐者則以會致祝柯之盟盟復伐齊與曰非也然則何爲以伐致也曰與人同事或執其君或取其地○取邾田自漵水軋辭也其不日惡盟也○季孫宿如晉○葬曹成公○夏衛孫林父帥師伐齊○秋七月辛卯齊侯環卒○晉士匄帥師伐齊至穀聞齊侯卒乃還還者事未畢之辭也受命而誅生死無所加其怒不伐喪善之也善之則何爲未畢也君不尸小事臣不專大名善則稱君過則稱己則民作讓矣士匄外專君命故非之也然則爲士匄者宜奈何宜墀帷而歸命乎介○八月丙辰仲孫蔑卒○齊殺其大夫高厚○鄭殺其大夫公子嘉○冬葬齊靈公○城西郛○叔孫豹會晉士匄于柯○城武城

二十年春王正月辛亥仲孫速會莒人盟于向○夏六月庚申公會晉侯齊侯宋公衛侯鄭伯曹伯莒子邾子滕子薛伯杞伯小邾子盟于澶淵○秋公至自會○仲孫速帥師伐邾○蔡殺其大夫公子濕蔡公子履出奔楚○陳侯之弟光出奔楚諸侯之尊弟兄不得以屬通其弟云者親之也親而奔之惡也○叔老如齊○冬十月丙辰朔日有食之○季孫宿如宋

二十有一年春王正月公如晉○邾庶其以漆闕丘來奔以者不以者也來奔者不言出舉其接我者也漆闕丘不言及小大敵也○夏公至自晉○秋晉欒盈出奔楚○九月庚戌朔日有食之○冬十月庚辰朔日有食之○曹伯來朝○公會晉侯齊侯宋公衛侯鄭伯曹伯莒子邾子于商任○庚子孔子生

二十有二年春王正月公至自會○夏四月○秋七月辛酉叔老卒○冬公會晉侯齊侯宋公衛侯鄭伯曹伯莒子邾子滕子薛伯杞伯小邾子于沙隨○公至自會○楚殺其大夫公子追舒

二十有三年春王二月癸酉朔日有食之○三月己巳杞伯匄卒○夏邾畀我來奔

○葬杞孝公○陳殺其大夫慶虎及慶寅稱國以殺罪累上也及慶寅慶寅累也陳侯之弟光自楚歸于陳○晉欒盈復人于晉入于曲沃○秋齊侯伐衛遂伐晉○八月叔孫豹帥師救晉次于雍澮言救後次非救也○己卯仲孫速卒○冬十月乙亥臧孫紇出奔邾其日正臧孫紇之出也遽伯玉曰不以道事其君者其出乎○晉人殺欒盈惡之弗有也○齊侯襲莒

二十有四年春叔孫豹如晉○仲孫羯帥師侵齊○夏楚子伐吳○秋七月甲子朔日有食之既○齊崔杼帥師伐莒○大水○八月癸巳朔日有食之○公會晉侯宋公衛侯鄭伯曹伯莒子邾子滕子薛伯杞伯小邾子于夷儀○冬楚子蔡侯陳侯許男伐鄭○公至自會○陳鍼宜咎出奔楚○叔孫豹如京師○大饑五穀不升爲大饑一穀不升謂之饑二穀不升謂之饑三穀不升謂之饑四穀不升謂之饑五穀不升謂之大侵大侵之禮君食不兼味臺榭不塗弛侯廷道不除百官布而不制鬼神禱而不祀此大侵之禮也

二十有五年春齊崔杼帥師伐我北鄙○夏五月乙亥齊崔杼弑其君光莊公失言

淫于崔氏○公會晉侯宋公衛侯鄭伯曹伯莒子邾子滕子薛伯杞伯小邾子于夷儀○六月壬子鄭公孫舍之帥師入陳○秋八月己巳諸侯同于重丘公至自會○衛侯入于夷儀○楚屈建帥師滅舒鳩○冬鄭公孫夏帥師伐陳○十有二月吳子謁伐楚門于巢卒以伐楚之事門于巢卒也于巢者外乎楚也門于巢乃伐楚也諸侯不生名取卒之名加之伐楚之上者見以伐楚卒也其見以伐楚卒何也古者大國過小邑小邑必飾城而請罪禮也吳子謁伐楚至巢入其門門人射吳子有矢創反舍而卒古者雖有文事必有武備非巢之不飾城而請罪非吳子之自輕也

二十有六年春王二月辛卯衛甯喜弑其君剽此不正其日何也殖也立之喜也君之正也○衛孫林父入于戚以叛○甲午衛侯衎復歸于衛日歸見知弑也○夏晉侯使荀吳來聘○公會晉人鄭良霄宋人曹人于澶淵○秋宋公殺其世子座○晉人執衛甯喜○八月壬午許男甯卒于楚○冬楚子蔡侯陳侯伐鄭○葬許靈公二十有七年春齊侯使慶封來聘○夏叔孫豹會晉趙武楚屈建蔡公孫歸生衛石惡陳孔奐鄭良霄許人曹人于宋○衛殺其大夫甯喜稱國以殺罪累上也甯喜弑

君其以累上之辭言之何也嘗爲大夫與之涉公事矣甯喜由君弑君而不以弑君之罪罪之者惡獻公也○衛侯之弟專出奔晉專喜之徒也專之爲喜之徒何也已雖急納其兄與人之臣謀弑其君是亦弑君者也專其曰弟何也專有是信者君賂不入乎喜而殺喜是君不直乎喜也故出奔晉織絢邯鄲終身不言衛專之去合乎春秋○秋七月辛巳豹及諸侯之大夫盟于宋溴梁之會諸侯在而不曰諸侯之大夫大夫不臣也晉趙武恥之豹云者恭也諸侯不在而曰諸侯之大夫大夫臣也其臣恭也晉趙武爲之會也○冬十有二月乙亥朔日有食之

二十有八年春無冰○夏衛石惡出奔晉○邾子來朝○秋八月大雩○仲孫羯如晉○冬齊慶封來奔○十有一月公如楚○十有二月甲寅天王崩○乙未楚子昭卒

二十有九年春王正月公在楚閔公也○夏五月公至自楚喜之也致君者殆其往而喜其反此致君之意義也○庚午衛侯衎卒○閔弑吳子餘祭閔門者也寺人不稱名姓閔不得齊於人不稱其君閔不得君其君也禮君不使無恥不近刑人不

狎敵不邇怨賤人非所貴也貴人非所刑也刑人非所近也舉至賤而加之吳子吳子近刑人也闞弒吳子餘祭仇之也○仲孫羯會晉荀盈齊高止宋華定衛世叔儀鄭公孫段曹人萬人邾人滕人薛人小邾人城杞古者天子封諸侯其地足以容其民其民足以滿城以自守也杞危而不能自守故諸侯之大夫相帥以城之此變之正也○晉侯使士鞅來聘○杞子來盟○吳子使札來聘吳其稱子何也善使延陵季子故進之也身賢賢也使賢亦賢也延陵季子之賢尊君也其名成尊於上也○秋七月葬衛獻公○齊高止出奔北燕其曰北燕從史文也○冬仲孫羯如晉

三十年春王正月楚子使遠罷來聘○夏四月蔡世子般弒其君固其不日子奪父政是謂夷之○五月甲午宋災伯姬卒取卒之日加之災上者見以災卒也其見以災卒奈何伯姬之舍失火左右曰夫人少辟火乎伯姬曰婦人之義保母不在宵不下堂左右又曰夫人少辟火乎伯姬曰婦人之義保母不在宵不下堂遂遂乎火而死婦人以貞爲行者也伯姬之婦道盡矣詳其事賢伯姬也○天王殺其弟佖夫傳曰諸侯目不首惡况於天子乎君無忍親之義天子諸侯所親者唯長子母弟耳天

王殺其弟佞夫甚之也○王子瑕奔晉○秋七月叔弓如宋葬共姬外夫人不書葬此其言葬何也吾女也卒災故隱而葬之也○鄭良霄出奔許自許入于鄭鄭人殺良霄不言大夫惡之也○冬十月葬蔡景公不日卒而月葬不葬者也卒而葬之不忍使父失民於子也○晉人齊人宋人衛人鄭人曹人莒人邾人滕人薛人杞人小邾人會于澶淵宋災故會不言其所爲其曰宋災故何也不言災故則無以見其善也其曰人何也救災以衆何救焉更宋之所喪財也澶淵之會中國不侵伐夷狄夷狄不入中國無侵伐八年善之也晉趙武楚屈建之力也

三十有一年春王正月○夏六月辛巳公薨于楚宮楚宮非正也○秋九月癸巳子野卒子卒日正也○己亥仲孫羯卒○冬十月滕子來會葬○癸酉葬我君襄公○十有一月莒人弑其君密州

昭公

元年春王正月公卽位繼正卽位正也○叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于郭○二月取鄆○夏秦伯之

弟鍼出奔晉諸侯之尊弟兄不得以屬通其弟云者親之也親而奔之惡也○六月丁巳邾子華卒○晉荀吳帥師敗狄于太原傳曰中國曰大原夷狄曰大鹵號從中國名從主人○秋莒去疾自齊入于莒莒展出奔吳○叔弓帥師疆鄆田疆之爲言猶竟也○葬邾悼公○冬十有一月己酉楚子卷卒○楚公子比出奔晉

二年春晉侯使韓起來聘○夏叔弓如晉○秋鄭殺其大夫公孫黑○冬公如晉至河乃復恥如晉故著有疾也○季孫宿如晉公如晉而不得入季孫宿如晉而得入惡季孫宿也

三年春王正月丁未滕子原卒○夏叔弓如滕○五月葬滕成公○秋小邾子來朝○八月大雩○冬大雨雹○北燕伯款出奔齊其曰北燕從史文也

四年春王正月大雨雪○夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申楚人執徐子○秋七月楚子蔡侯陳侯許男頓子胡子沈子淮夷伐吳執齊慶封殺之此入而殺其不言入何也慶封封乎吳鍾離其不言伐鍾離何也不與吳封也慶封其以齊氏何也爲齊討也靈王使人以慶封令於軍

中曰有若齊慶封弑其君者乎慶封曰子一息我亦且一言曰有若楚公子圍弑其兄之子而代之爲君者乎軍人粲然皆笑慶封弑其君而不以弑君之罪罪之者慶封不爲靈王服也不與楚討也春秋之義用貴治賤用賢治不肖不以亂治亂也孔子曰懷惡而討雖死不服其斯之謂與遂滅厲遂繼事也○九月取緡○冬十有二月乙卯叔孫豹卒

五年春王正月舍中軍貴復正也○楚殺其大夫屈申○公如晉○夏莒牟夷以牟婁及防茲來奔以者不以者也來奔者不言出及防茲以大及小也莒無大夫其曰牟夷何也以其地來也以地來則何以書也重地也○秋七月公至自晉○戊辰叔弓帥師敗莒師于賁泉狄人謂賁泉失台號從中國名從主人○秦伯卒○冬楚子蔡侯陳侯許男頓子沈子徐人越人伐吳

六年春王正月杞伯益姑卒○葬秦景公○夏季孫宿如晉○葬杞文公○宋華合比出奔衛○秋九月大雩○冬遠罷帥師伐吳○冬叔弓如楚○齊侯伐北燕

七年春王正月暨齊平平者成也暨猶暨暨也暨者不得已也以外及內曰暨○三

月公如楚○叔孫婁如齊莅盟莅位也內之前定之辭謂之莅外之前定之辭謂之來○夏四月甲辰朔日有食之○秋八月戊辰衛侯惡卒鄉曰衛齊侯今日衛侯惡此何爲君臣同名也君子不奪人名不奪人親之所名重其所以來也王父名子也○九月公至自楚○冬十有一月癸未季孫宿卒○十有二月癸亥葬衛襄公

八年春陳侯之弟招殺陳世子偃師鄉曰陳公子招今日陳侯之弟招何也曰盡其親所以惡招也兩下相殺不志乎春秋此其志何也世子云者唯君之貳也云可以重之存焉志之也諸侯之尊兄弟不得以屬通其弟云者親之也親而殺之惡也○夏四月辛丑陳侯溺卒○叔弓如晉○楚人執陳行人于微師殺之稱人以執大夫執有罪也稱行人怨接於上也陳公子留出奔鄭○秋蒐于紅正也因蒐狩以習用武事禮之大者也艾蘭以爲防置旃以爲轅門以葛覆質以爲禁流旁握御轡者不得入車軌塵馬候蹄揜禽旅御者不失其馳然後射者能中過防弗逐不從奔之道也面傷不獻不成禽不獻禽雖多天子取三十焉其餘與士衆以習射於射宮射而中田不得禽則得禽田得禽而射不中則不得禽是以知古之貴仁義而賤勇力也

○陳人殺其大夫公子過○大雩○冬十月壬午楚師滅陳執陳公子招放之于越殺陳孔奐惡楚子也○葬陳哀公不與楚滅閔公也

九年春叔弓會楚子于陳○許遷于夷○夏四月陳火國曰災邑曰火火不志此何以志閔陳而存之也○秋仲孫纒如齊○冬築郎囿

十年春王正月○夏齊欒施來奔○秋七月季孫意如叔弓仲孫纒帥師伐莒○戊子晉侯彪卒○九月叔孫婁如晉○葬晉平公○十有二月甲子宋公成卒

十有一年春王二月叔弓如宋○葬宋平公○夏四月丁巳楚子虔誘蔡侯般殺之于申何爲名之也夷狄之君誘中國之君而殺之故謹而名之也稱時稱月稱日稱地謹之也○楚公子棄疾帥師圍蔡○五月甲申夫人歸氏薨○大蒐于比蒲○仲孫纒會邾子盟于祊祥○秋季孫意如會晉韓起齊國弱宋華亥衛北宮佗鄭罕虎曹人杞人于厥憇○九月己亥葬我小君齊歸○冬十有一月丁酉楚師滅蔡執蔡世子友以歸用之此子也其曰世子何也不與楚殺也一事注乎志所以惡楚子也十有二年春齊高偃帥師納北燕伯于陽納者內不受也燕伯之不名何也不以高

偃挈燕伯也○三月壬申鄭伯嘉卒○夏宋公使華定來聘○公如晉至河乃復季孫氏不使遂乎晉也○五月葬鄭簡公○楚殺其大夫成虎○秋七月○冬十月公子憇出奔齊○楚子伐徐○晉伐鮮虞其曰晉狄之也其狄之何也不正其與夷狄交伐中國故狄稱之也

十有三年春叔弓帥師闞費○夏四月楚公子比自晉歸于楚弑其君虔于乾溪自晉晉有奉焉爾歸而弑不言歸言歸非弑也歸一事也弑一事也而遂言之以比之歸弑比不弑也弑君者日不日比不弑也○楚公子棄疾殺公子比當上之辭也當上之辭者謂不稱人以殺乃以君殺之也討賊以當上之辭殺非弑也比之不弑有四取國者稱國以弑楚公子棄疾殺公子比比不嫌也春秋不以嫌代嫌棄疾主其事故嫌也○秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘八月甲戌同盟于平丘公不與盟同者有同也同外楚也公不與盟者可以與而不與讖在公也其日善是盟也晉人執季孫意如以歸公至自會○蔡侯廬歸于蔡○陳侯吳歸于陳善其成之會而歸之故謹而日之此未嘗有國也使

如失國辭然者不與楚滅也○冬十月葬蔡靈公變之不葬有三失德不葬弑君不葬滅國不葬然且葬之不與楚滅且成諸侯之事也○公如晉至河乃復○吳滅州來

十有四年春意如至自晉大夫執則致致則名意如惡然而致見君臣之禮也○三月曹伯滕卒○夏四月○秋葬曹武公○八月莒子去疾卒○冬莒殺其公子意恢言公子而不言大夫莒無大夫也莒無大夫而曰公子意恢意恢賢也曹莒皆無大夫其所以無大夫者其義異也

十有五年春王正月吳子夷末卒○二月癸酉有事于武宮籥入叔弓卒去樂卒事君在祭樂之中聞大夫之喪則去樂卒事禮也君在祭樂之中大夫有變以聞可乎大夫國體也古之人重死君命無所不通○夏蔡朝吳出奔鄭○六月丁巳朔日有食之○秋晉荀吳帥師伐鮮虞○冬公如晉

十有六年春齊侯伐徐○楚子誘戎蠻子殺之○夏公至自晉○秋八月己亥晉侯夷卒○九月大雩○季孫意如如晉○冬十月葬晉昭公

十有七年春小邾子來朝○夏六月甲戌朔日有食之○秋邾子來朝○八月晉荀吳帥師滅陸渾戎○冬有星孛于大辰一有一亡曰有于大辰者濫于大辰也○楚人及吳戰于長岸兩夷狄曰敗中國與夷狄亦曰敗楚人及吳戰于長岸進楚子故曰戰

十有八年春王三月曹伯須卒○夏五月壬午宋衛陳鄭災其志以同日也其日亦以同日也或曰人有謂鄭子產曰某日有災于產曰天者神子惡知之是人也同日爲四國災也○六月邾人入郟○秋葬曹平公○冬許遷于白羽

十有九年春宋公伐邾○夏五月戊辰許世子止弑其君買日弑正卒也正卒則止不弑也不弑而曰弑責止也止曰我與夫弑者不立乎其位以與其弟鵬哭泣歆飭粥啜不容粒未踰年而死故君子卽止自責而責之也○已卯地震○秋齊高發帥師伐莒○冬葬許悼公日卒時葬不使止爲弑父也曰子既生不免乎水火母之罪也羈貫成童不就師傳父之罪也就師學問無方心志不通身之罪也心志既通而名譽不聞友之罪也名譽既聞有司不舉有司之罪也有司舉之王者不用王者之

過也許世子不知嘗藥累及許君也

二十年春王正月○夏曹公孫會自夢出奔宋自夢者專乎夢也曹無大夫其曰公孫何也言其以貴取之而不以叛也○秋盜殺衛侯之兄輒盜賤也其曰兄母兄也目衛侯衛侯累也然則何爲不爲君也曰有天疾者不得入乎宗廟輒者何也曰兩足不能相過齊謂之綦楚謂之跽衛謂之輒○冬十月宋華亥向寧華定出奔陳○十有一月辛卯蔡侯廡卒

二十有一年春王三月葬蔡平公○夏晉侯使士鞅來聘○宋華亥向寧華定自陳入于宋南里以叛自陳陳有奉焉爾入者內弗受也其曰宋南里宋之南鄙也以者不以者也叛直叛也○秋七月壬午朔日有食之○八月乙亥叔輒卒○冬蔡侯東出奔楚東者東國也何爲謂之東也王父誘而殺焉父執而用焉奔而又奔之曰東惡之而貶之也○公如晉至河乃復

二十有二年春齊侯伐莒○宋華亥向寧華定自宋南里出奔楚自宋南里者專也○大蒐于昌間秋而曰蒐此春也其曰蒐何也以蒐事也○夏四月乙丑天王崩○

六月叔鞅如京師○葬景王王室亂亂之爲言事未有所成也劉子單于以王猛居于皇以者不以者也王猛嫌也○秋劉子單子以王猛入于王城以者不以者也入者內弗受也○冬十月王于猛卒此不卒者也其曰卒失嫌也○十有二月癸酉朔日有食之

二十有三年春王正月叔孫婍如晉○癸丑叔鞅卒○晉人執我行人叔孫婍○晉人圍郊○夏六月蔡侯東國卒于楚○秋七月莒子庚與來奔○戊辰吳敗頓胡沈蔡陳許之師于雞甫胡子髡沈子盈滅中國不言敗此其言敗何也中國不敗胡子髡沈于盈其滅乎其言敗釋其滅也獲陳夏鬻獲者非與之辭也上下之稱也○天王居于狄泉始王也其曰天王因其居而王之也尹氏立王于朝立者不宜立者也朝之不名何也別嫌乎尹氏之朝也○八月乙未地震○冬公如晉至河公有疾乃復疾不志此其志何也釋不得入乎晉也

二十有四年春王二月丙戌仲孫纁卒○婍至自晉大夫執則致致則挈由上致之也○夏五月乙未朔日有食之○秋八月大雩○丁酉杞伯郁釐卒○冬吳滅巢○

葬杞平公

二十有五年春叔孫婁如宋○夏叔倪會晉趙鞅宋樂大心衛北宮喜鄭游吉曹人邾人滕人薛人小邾人于黃父○有鸛鵒來巢一有一亡曰有來者來中國也鸛鵒穴者而曰巢或曰增之也○秋七月上辛大雩季辛又雩季者有中之辭也又有繼之辭也○九月乙亥公孫于齊孫之爲言猶孫也諱奔也次于陽州次止也齊侯唁公子野井弔失國曰唁唁公不得入於魯也○冬十月戊辰叔孫婁卒○十有一月己亥宋公佐卒于曲棘邾公也○十有二月齊侯取鄆取易辭也內不言取以其爲公取之故易言之也

二十有六年春王正月葬宋元公○三月公至自齊居于鄆公次于陽州其曰至自齊何也以齊侯之見公可以言至自齊也居于鄆者公在外也至自齊道義不外公也○夏公圍成非國不言圍所以言圍者以大公也○秋公會齊侯莒子邾子杞伯盟于鄆陵公至自會居于鄆公在外也至自會道義不外公也○九月庚申楚子居卒○冬十月天王入于成周周有入無出也尹氏召伯毛伯以王子朝奔楚遠矣非

也奔直奔也

二十有七年春公如齊公至自齊居于鄆公在外也○夏四月吳弑其君僚○楚殺其大夫鄧宛○秋晉士鞅宋樂祁犁衛北宮喜曹人邾人滕人會于扈○冬十月曹伯午卒○邾快來奔○公如齊公至自齊居于鄆

二十有八年春王三月葬曹悼公○公如晉次子乾侯公在外也○夏四月丙戌鄭伯寧卒○六月葬鄭定公○秋七月癸巳滕子寧卒○冬葬滕悼公

二十有九年春公至自乾侯居于鄆齊侯使高張來唁公唁公不得入於魯也○公如晉次于乾侯○夏四月庚子叔倪卒季孫意如曰叔倪無病而死此皆無公也是天命也非我罪也○秋七月○冬十月鄆潰潰之爲言上下不相得也上下不相得則惡矣亦譏公也昭公出奔民如釋重負

三十年春王正月公在乾侯中國不存公存公故也○夏六月庚辰晉侯去疾卒○秋八月葬晉頃公○冬十有二月吳滅徐徐子章羽奔楚

三十有一年春王正月公在乾侯○季孫意如會晉荀栎于適歷○夏四月丁巳薛

伯穀卒○晉侯使荀欒唁公于乾侯唁公不得入於魯也曰既爲君言之矣不可者意如也○秋葬薛獻公○冬黑肱以濫來奔其不言邾黑肱何也別乎邾也其不言濫子何也非天子所封也來奔內不言叛也○十有二月辛亥朔日有食之

三十有二年春王正月公在乾侯取闕○夏吳伐越○秋七月○冬仲孫何忌會晉韓不信齊高張宋仲幾衛太叔申鄭國參曹人莒人邾人杞人杞人小邾人城成周天子微諸侯不享覲天子之在者惟祭與號故諸侯之大夫相帥以城之此變之正也○十有二月己未公薨于乾侯

定公

元年春王不言正月定無正也定之無正何也昭公之終非正終也定之始非正始也昭無正終故定無正始不言卽位喪在外也○三月晉人執宋仲幾子京師此其大夫其曰人何也微之也何爲微之不正其執人於尊者之所也不與大夫之伯討也○夏六月癸亥公之喪至自乾侯○戊辰公卽位殯然後卽位也定無正見無以正也踰年不言卽位是有故公也言卽位是無故公也卽位授受之道也先君無正

終則後君無正始也先君有正終則後君有正始也戊辰公即位謹之也定之即位不可不察也公即位何以日也戊辰之日然後即位也癸亥公之喪至自乾侯何爲戊辰之日然後即位也正君乎國然後即位也沈子曰正棺乎兩楹之間然後即位也內之大事日即位君之大事也其不日何也以年決者不以日決也此則其日何也著之也何著焉踰年即位厲也於厲之中又有義焉未殯雖有天子之命猶不敢况臨諸臣乎周人有喪魯人有喪周人弔魯人不弔周人曰固吾臣也使人可也魯人曰吾君也親之者也使大夫則不可也故周人弔魯人不弔以其下成康爲未久也君至尊也去父之殯而弔猶不敢况未殯而臨諸臣乎○秋七月癸巳葬我君昭公○九月大雩雩月雩之正也秋大雩非正也冬大雩非正也秋大雩雩之爲非正何也毛澤未盡人力未竭未可以雩也雩月雩之正也月之爲雩之正何也其時窮人力盡然後雩雩之正也何謂其時窮人力盡是月不雨則無及矣是年不艾則無食矣是謂其時窮人力盡也雩之必待其時窮人力盡何也雩者爲旱求者也求者請也古之人重請何重乎請人之所以爲人者讓也請道去讓也則是舍其所以

爲人也是以重之焉請哉請乎應上公古之神人有應上公者通乎陰陽君親帥諸大夫道之而以請焉夫請者非可詒託而往也必親之者也是以重之○立煬宮立者不宜立者也○冬十月隕霜殺菽未可以殺而殺舉重可殺而不殺舉輕其曰菽舉重也

二年春王正月○夏五月壬辰雉門及兩觀災其不曰雉門災及兩觀何也災自兩觀始也不以尊者親災也先言雉門尊尊也○秋楚人伐吳○冬十月新作雉門及兩觀言新有舊也作爲也有加其度也此不正其以尊者親之何也雖不正也於美猶可也

三年春王正月公如晉至河乃復○三月辛卯邾子穿卒○夏四月○秋葬邾莊公○冬仲孫何忌及邾子盟于拔

四年春王二月癸巳陳侯吳卒○三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏子召陵侵楚○夏四月庚辰蔡公孫姓帥師滅沈以沈子嘉歸殺之○五月公及諸侯盟于臯鼫○後而再

會公志於後會也後志疑也杞伯成卒于會○六月葬陳惠公○許遷于容城○秋七月公至自會○劉卷卒此不卒而卒者賢之也寔內諸侯也非列土諸侯此何以卒也天王崩爲諸侯主也○葬杞悼公○楚人圍蔡○晉士鞅衛孔圉帥師伐鮮虞○葬劉文公○冬十有一月庚午蔡侯以吳子及楚人戰于伯舉楚師敗績吳其稱子何也以蔡侯之以之舉其貴者也蔡侯之以之則其舉貴者何也吳信中國而攘夷狄吳進矣其信中國而攘夷狄奈何子胥父誅于楚也挾弓持矢而干闥廬闥廬曰大之甚勇之甚爲是欲興師而伐楚子胥諫曰臣聞之君不爲匹夫興師且事君猶事父也虧君之義復父之讎臣弗爲也於是止蔡昭公朝於楚有美裘正是日囊瓦求之昭公不與爲是拘昭公於南郢數年然後得歸歸乃用事乎漢曰苟諸侯有欲伐楚者寡人請爲前列焉楚人聞之而怒爲是興師而伐蔡蔡請救于吳子胥曰蔡非有罪楚無道也君若有憂中國之心則若此時可矣爲是興師而伐楚何以不言救也救大也楚囊瓦出奔鄭庚辰吳入楚日入易無楚也易無楚者壞宗廟徙陳器撻平王之墓何以不言滅也欲存楚也其欲存楚奈何昭王之軍敗而逃父老送

之曰寡人不肖亡先君之邑父老反矣何憂無君寡人且用此入海矣父老曰有君如此其賢也以衆不如吳以必死不如楚相與擊之一夜而三敗吳人復立何以謂之吳也狄之也何謂狄之也君居其君之寢而妻其君之妻大夫居其大夫之寢而妻其大夫之妻蓋有欲妻楚王之母者不正乘敗人之績而深爲利居人之國故反其狄道也

五年春王正月辛亥朔日有食之○夏歸粟于蔡諸侯無粟諸侯相歸粟正也孰歸之諸侯也不言歸之者專辭也義邇也○於越入吳○六月丙申季孫意如卒○秋七月壬子叔孫不敢卒○冬晉士鞅帥師圍鮮虞

六年春王正月癸亥鄭游速帥師滅許以許男斯歸○二月公侵鄭公至自侵鄭○夏季孫斯仲孫何忌如晉○秋晉人執宋行人樂祁犁○冬城中城城中城者三家張也或曰非外民也○季孫斯仲孫忌帥師圍郟

七年春王正月○夏四月○秋齊侯鄭伯盟于鹹○齊人執衛行人北宮結以侵衛以重辭也衛人重北宮結○齊侯衛侯盟于沙○大雩○齊國夏帥師伐我西鄙○

○九月大雩○冬十月

八年春王正月公侵齊公至自侵齊○二月公侵齊三月公至自侵齊公如往時致月危致也往月致時危往也往月致月惡之也○曹伯露卒○夏齊國夏帥師伐我西鄙○公會晉師于瓦公至自瓦○秋七月戊辰陳侯柳卒○晉士鞅帥師侵鄭遂侵衛○葬曹靖公○九月葬陳懷公○季孫斯仲孫何忌帥師侵衛○冬衛侯鄭伯盟于曲濮○從祀先公貴復正也○盜竊寶玉大弓寶玉者封圭也大弓者武王之戎弓也周公受賜藏之魯非其所以與人而與人謂之亡非其所取而取之謂之盜九年春王正月○夏四月戊申鄭伯蠆卒○得寶玉大弓其不地何也寶玉大弓在家則羞不目羞也惡得之得之堤下或曰陽虎以解衆也○六月葬鄭獻公○秋齊侯衛侯次于五氏○秦伯卒○冬葬秦哀公

十年春王三月及齊平○夏公會齊侯于頰谷公至自頰谷離會不致何爲致也危之也危之則以地致何也爲危之也其危奈何曰頰谷之會孔子相焉兩君就壇兩相相揖齊人鼓譟而起欲以執魯君孔子歷階而上不盡一等而視歸乎齊侯曰兩

君合好夷狄之民何爲來爲命司馬止之齊侯遽巡而謝曰寡人之過也退而屬其二三大夫曰夫人率其君與之行古之道二三子獨率我而入夷狄之俗何爲罷會齊人使優施舞於魯君之幕下孔子曰笑君者罪當死使司馬行法焉首足異門而出齊人來歸鄆謹龜陰之田者蓋爲此也因是以見雖有文事必有武備孔子於頰谷之會見之矣○晉趙鞅帥師圍衛○齊人來歸鄆謹龜陰之田○叔孫州仇仲孫何忌帥師圍郕○秋叔孫州仇仲孫何忌帥師圍郕○宋樂大心出奔曹○宋公子地出奔陳○冬齊侯衛侯鄭游速會于安甫○叔孫州仇如齊○宋公之弟辰暨宋仲佗石彊出奔陳

十有一年春宋公之弟辰未失其弟也及仲佗石彊公子地以尊及卑也自陳陳有奉焉爾入于蕭以叛入者內弗受也以者不以也叛直叛也○夏四月○秋宋樂大心自曹入于蕭○冬及鄭平○叔還如鄭莅盟

十有二年春薛伯定卒○夏葬薛襄公○叔孫州仇帥師墮郕猶取也○衛公孟彊帥師伐曹○季孫斯仲孫何忌帥師墮費○秋大雩○冬十月癸亥公會齊侯盟

于黃○十有一月丙寅朔日有食之○公至自黃○十有二月公圍成非國言圍成成大公也公至自圍成何以致危之也何危爾邊乎齊也

十有三年春齊侯次于垂葭○夏築蛇淵圍○大蒐于比蒲○衛公孟彊帥師伐曹○秋晉趙鞅入于晉陽以叛以者不以者也叛直叛也○冬晉荀寅士吉射入于朝歌以叛○晉趙鞅歸于晉此叛也其以歸言之何也貴其以地反也貴其以地反則是大利也非大利也許悔過也許悔過則何以言叛也以地正國也以地正國則何以言叛其入無君命也○薛弑其君比

十有四年春衛公叔戌來奔○晉趙陽出奔宋○二月辛巳楚公子結陳公孫佗人帥師滅頓以頓子牂歸○夏衛北宮結來奔○五月於越敗吳于檇李○吳子光卒○公會齊侯衛侯于牽公至自會○秋齊侯宋公會于洸○天王使石尙來歸賑賑者何也組實也祭肉也生日賑熟曰膳其辭石尙士也何以知其士也天子之大夫不名石尙欲書春秋諫曰久矣周之不行禮於魯也請行賑貴復正也○衛世子蒯聵出奔宋衛公孟彊出奔鄭○宋公之弟辰自蕭來奔○大蒐于比蒲○邾子來會

公○城莒父及霅

十有五年春王正月邾子來朝○鼯鼠食郊牛牛死改卜牛不敬莫大焉○二月辛丑楚子滅胡以胡子豹歸○夏五月辛亥郊○壬申公薨于高寢高寢非正也○鄭罕達帥師伐宋○齊侯衛侯次于渠蔭○邾子來奔喪喪急故以奔言之○秋七月壬申弋氏卒妾辭也哀公之母也○八月庚辰朔日有食之○九月滕子來會葬○丁巳葬我君定公雨不克葬葬既有日不爲雨止禮也雨不克葬喪不以制也戊午日下稷乃克葬乃急辭也不足乎日之辭也○辛巳葬定弋○冬城漆

哀公

元年春王正月公卽位○楚子陳侯隨侯許男圍蔡○鼯鼠食郊牛角改卜牛○夏四月辛巳郊此該之變而道之也於變之中又有言焉鼯鼠食郊牛角改卜牛志不敬也郊牛日展解角而知傷展道盡矣郊自正月至于三月郊之時也夏四月郊不時也五月郊不時也夏之始可以承春以秋之末承春之始蓋不可矣九月用郊用者不宜用者也郊三卜禮也四卜非禮也五卜強也卜免牲者吉則免之不吉則否

牛傷不言傷之者傷自牛作也故其辭緩全曰牲傷曰牛未牲曰牛其牛一也其所
以爲牛者異有變而不郊故卜免牛也已牛矣其尙卜免之何也禮與其亡也寧有
嘗置之上帝矣故卜而後免之不敢專也卜之不吉則如之何不免安置之繫而待
六月上甲始庀牲然後左右之子之所言者牲之變也而曰我一該郊之變而道之
何也我以六月上甲始庀牲十月上甲始繫牲十一月十二月牲雖有變不道也待
正月然後言牲之變此乃所以該郊享道也費其時大其禮其養牲雖小不備可
也子不忘三月卜郊何也郊自正月至于三月郊之時也我以十二月下辛卜正月
上辛如不從則以正月下辛卜二月上辛如不從則以二月下辛卜三月上辛如不
從則不郊矣○秋齊侯衛侯伐晉○冬仲孫何忌帥師伐邾

二年春王二月季孫斯叔孫州仇仲孫何忌帥師伐邾取漵東田漵東未盡也及沂
西田沂西未盡也癸巳叔孫州仇仲孫何忌及邾子盟于句繹三人伐而二人盟何
也各盟其得也○夏西月丙子衛侯元卒○滕子來朝○晉趙鞅帥師納衛世子蒯
臧于戚納者內弗受也帥師而後納者有伐也何用弗受也以輒不受也以輒不受

父之命受之王父也信父而辭王父則是不尊王父也其弗受以尊王父也○秋八月甲戌晉趙鞅帥師及鄭罕達帥師戰于鐵鄭師敗績○冬十月葬衛靈公○十有一月蔡遷于州來蔡殺其大夫公子驪

三年春齊國夏衛石曼姑帥師圍戚此衛事也其先國夏何也子不圍父也不繫戚於衛者子不有父也○夏四月甲午地震○五月辛卯桓宮僖宮災言及則祖有尊卑由我言之則一也○季孫斯叔孫州仇帥師城啓陽○宋樂髡帥師伐曹○秋七月丙子季孫斯卒○蔡人放其大夫公孫獵于吳○冬十月癸卯秦伯卒○叔孫州仇仲孫何忌帥師圍邾

四年春王二月庚戌盜弑蔡侯申稱盜以弑君不以上下道道也內其君而外弑者不以弑道道也春秋有三盜微殺大夫謂之盜非所取而取之謂之盜辟中國之正道以襲利謂之盜○蔡公孫辰出奔吳○葬秦惠公○宋人執小邾子○夏蔡殺其大夫公孫姓公姓霍○晉人執戎蠻子赤歸于楚○城西郛○六月辛丑亳社災亳社者亳之社也亳亡國也亡國之社以爲廟屏戒也其屋亡國之社不得上達也○

秋八月甲寅滕子結卒○冬十有二月葬蔡昭公○葬滕頃公

五年春城毗○夏齊侯伐宋○晉趙鞅帥師伐衛○秋九月癸酉齊侯杵臼卒○冬叔還如齊○閏月葬齊景公不正其閏也

六年春城邾瑕○晉趙鞅帥師伐鮮虞○吳伐陳○夏齊國夏及高張來奔○叔還會吳于柤○秋七月庚寅楚子軫卒○齊陽生入于齊○齊陳乞弑其君荼陽生入而弑其君以陳乞主之何也不以陽生君荼也其不以陽生君荼何也陽生正荼不正不正則其曰君何也荼雖不正已受命矣入者內弗受也荼不正何用弗受以其受命可以言弗受也陽生其以國氏何也取國于荼也○冬仲孫何忌帥師伐邾○宋向巢帥師伐曹

七年春宋皇瑗帥師侵鄭○晉魏曼多帥師侵衛○夏公會吳于緡○秋公伐邾八月己酉入邾以邾子益來以者不益之名惡也春秋有臨天下之言焉有臨一國之言焉有臨一家之言焉其言來者有外魯之辭焉○宋人圍曹○冬鄭駟弘帥師救曹

八年春王正月宋公入曹以曹伯陽歸○吳伐我○夏齊人取讎及濶內也○歸
邾子益于邾益之名失國也○秋七月○冬十有二月癸亥杞伯過卒○齊人歸讎
及濶

九年春王二月葬杞僖公○宋皇瑗帥師取鄭師于雍丘取易辭也以師而易取鄭
病矣○夏楚人伐陳○秋宋公伐鄭○冬十月

十年春王二月邾子益來奔○公會吳伐齊○三月戊戌齊侯陽生卒○夏宋人伐
鄭○晉趙鞅帥師侵齊○五月公至自伐齊○葬齊悼公○衛公孟彊自齊歸于衛
○薛伯夷卒○秋葬薛惠公○冬楚公子結帥師伐陳吳救陳

十有一年春齊國書帥師伐我○夏陳轅頗出奔鄭○五月公會吳伐齊甲戌齊國
書帥師及吳戰于艾陵齊師敗績獲齊國書○秋七月辛酉滕子處母卒○冬十有
一月葬滕隱公○衛世叔齊出奔宋

十有二年春用田賦○古者公田什一用田賦非正也○夏五月甲辰孟子卒孟子
者何也昭公夫人也其不言夫人何也諱取同姓也○公會吳于橐臯○秋公會衛

侯宋皇瑗于鄆○宋向巢帥師伐鄭○冬十有二月螽

十有三年春鄭罕達帥師取宋師于岳取易辭也以師而易取宋病矣○夏許男成卒○公會晉侯及吳子于黃池黃池之會吳子進乎哉遂子矣吳夷狄之國也祝髮文身欲因魯之禮因晉之權而請冠端而襲其藉于成周以尊天王吳進矣吳東方之大國也累累致小國以會諸侯以合乎中國吳能爲之則不臣乎吳進矣王尊稱也子卑稱也辭尊稱而居卑稱以會乎諸侯以尊天王吳王夫差曰好冠來孔子曰大矣哉夫差未能言冠而欲冠也○楚公子申帥師伐陳○於越入吳○秋公至自會○晉魏曼多帥師侵衛○葬許元公○九月螽○冬十有一月有星孛于東方○盜殺陳夏區夫○十有二月螽

十有四年春西狩獲麟引取之也狩地不地不狩也非狩而曰狩大獲麟故大其適也其不言來不外麟於中國也其不言有不使麟不恆於中國也

春秋穀梁傳終